

# JA NØKY MIDI JA PABLO TYANĪGAJX JA ROMĪT JAA'Y

Ku ja Pablo tñijayi  
pøn tjanchja'widip ja  
Jesucristo jam Roma

**1** Pablo'ajtp øts, jøts øts ja nwindson'ajtim Jesucristo nmidumpy. Øts ja Dios tø xwi'ixy jøts øts yide'en ngudanaaby'att. Yide'en idø'on wa'ats kajpxy nbiktaajkin, ja' øts idø'on tø xanibiktaagi jøts øts ja ngajpxwa'kxit ja kyajpxy ja y'ayuujk midi nitso'ok'ajtin xukpaajtimp.

<sup>2</sup>Pø mā windi'ixyip Dios Teety yø tñigajpxni, jøts ja kyugajpxy ttukyiknaxy yø'øbi winmaa'n yø'øbi xipøjkin jap mā y'ity ja kyajpxy ja y'ayuujk, <sup>3</sup>jøts tñigajpxy ja Dios U'nk pøn nwindson'ajtim Jesucristo'ajtp. Ku ja tñigajpxi ja yjaa'y'ajtin ja ñaxwiin'ajtin, ja rey David idø'on ja y'apteety'ajtpy; <sup>4</sup>kuts ja dios'ajtin, jats ja tyiknigaxi'jky ku xemikøjxp jadigojk yjujkpyijky jøts kyutujky møk'ampy, jøts ku dø'on ja Dios U'ngi. <sup>5</sup>Ja nwindson'ajtim Jesucristo køjxp øøts ja Dios Teety tø xmø'øy ja kunuu'kxin jøts øøts ja ngudanit, jøts ya naxwiin yja'attit

pøn tjanchjawidip pøn tpaduujnidip ja Dios yja' o mā'et o magajp. <sup>6</sup>Jøts meets idø'on nayide'en mjaa'y'ajtmi, nayi tøxi ja Dios mwilijxyidi jøts meets ja Jesucristo mja'atidit.

<sup>7</sup>Meets idø'on nniija'ayidip niwine'enin jam mdsøonidi mdanidi Romit kajpkøjxp, niwine'enin ja Dios mdaba'ayøyidi ja chojkin, jøts ja mdamidsøkyidi jøts ja amuum mnadyamiyoxidit. Mbattipts ja kunuu'kxin jøts ja øy'ajtin midi ja Dios Teety yajkpy møøt ja nwindson'ajtim Jesucristo.

Ku ja Pablo Roma y'ats'otswa'añ

<sup>8</sup>Jawyeen øts ja Dios Teety ndukmøjawi ndukunuu'kxyjawi ja nwindson'ajtim Jesucristo køjxp, ku mee ni'ijtyi myiknigajpxti myiknimadya'akti øy mādsos sa ja janchja'win xjagyapti.

<sup>9</sup>Diosts testigi'ajtp pøn øts ja y'U'nk ja kyajpxy ja y'ayuujk ngajpxwa'kxiip amumjoojt, ku meets ejtp nja'myech ku øts ja Dios nmidsapajpxy. <sup>10</sup>Ejtp øts ja Dios n'amidøy nbøktsøy jøts tyik'amøjatt jøts mee n'ats'ext, ja' kø'øm kyunuu'kxingøjxp. <sup>11</sup>Ja ku nbaatwa'andi n'ejxwa'andi

jøts nmo'owa'andi yiin waan ja pudøjkin sa Dios ttsøky, jøts yjaakmøjit yjaakmayit ja m'ajot'ajtindi. <sup>12</sup>Jade'en'ampy øts idø'on ndijy jøts nixem niyam nnagyajpxjot'amøjka'andit nyiknigaxø'jkindit, jade'engøjpx sa jadu'uk jadu'uk njagyejpyindi ja janchja'win.

<sup>13</sup>Uknimadowdi migu'uktøjkti, kawinaak ojk øts jam tø njanchjanøjkxwa'añ jøts mee n'ats'ext, ni ixymbaatnim ø nganijkxy. Jade'en'ampy øts jam njanøjkxwa'añ jøts meets ndukmadowa'añ ja Dios yja', jøts ø n'ext sa wyingaxi'iky øts ja ndunkjøøjp, sam ø tø n'ixy abikyajp ma jaty ø tø nwidity. <sup>14</sup>Xpaat'ajtpxi øts niduki'iyi pøn ka'israelit jaa'dyi, wan ja t'ixpikyidi tka'ixpikyidi; <sup>15</sup>jøp'ijxy ø nnanky'ityi jøts mee nayide'en ndukmado't ja Dios y'øgyajpxy ja Dios y'ømyadya'aky, pøn jaty jam Roma tsinaadyip.

**Sa ja møk'ajtin tjagyepy ja Dios y'øgyajpxy ja Dios y'ømyadya'aky**

<sup>16</sup>Ka' øts ja Dios y'øgyajpxy y'ømyadya'aky ndatsø'ødyuujniyi, pø ja'axi ja' myøk'ajtin ja'axi ja yiktumpy, jøts ja ñitso'ok'atti pøn tjanchja'widip ja nwindsøn'ajtim, ja israelit jaa'y tyimyjapaajtidip, nayide'ents pøn ka'israelitjaa'ymidi. <sup>17</sup>Yø'øbi øgyajpxy ømyadya'aky tngajpxp jøts ku janchja'wingøjpx ja Dios xkupijkyindi, janchja'wingøjpx ja'ayi sam ja Dios kyajpxy y'ayuujk tyiktaañ ku wyaañ yide'en: "Pøn kupøjkip ja Dios, ja yjanchja'win ja ttukpaatip ja xemikøjxpit tsinaa'yin."

**Ja naxwii'ñit jaa'y pyøky**

<sup>18</sup>Jap tsajpjøtpy ja Dios tyiktsøñ ja møj ayo'on, jøts ja ttuktagida'aky ja kawindiyjaa'dyi ja ka'øyjaa'dyi, pøn kya'øy'ajtingøjpx kyanankñijawiwyaajnidip ja Dios yja'. <sup>19</sup>Yjanija'widip wa'ats jøts tigøjpx pyaat'atyti ku ja Dios yiknijawit, pø tøxi ja kø'øm tyuk'ijxyidi <sup>20</sup>sa ja myøk'ajtin y'ejxi tyiyi øy ja yjagagaxi'iky. Jade'en'ampyts ja yik'ixy yiknijawi ku yik'ixy sa ja tø tyik'øyi ja naxwii'ñit, jøts ku ja' tu'ugyi Dios'aty ku ja myøk'ajtin xemikøjpx myajada'aky; paty ja ka'ap pyaat'atyidi ja'abi jaa'y jøts ja yiktamaa'kxtit jøts ku dø'on ja Dios ja tkanijawidi. <sup>21</sup>Øy ja tjanijawidi ja Dios jade'en, ka'apts ja twindsø'øgidi, ka'ap ja tmøjawidi tkunuu'kxyjawidi sam ja Dios pyaat'atyin. Ne'egi wimbet'ampy ja ne'egi wyinmaydi, ja' tyajotkøjxtip midi niti kawamp jøts ja wyinmaa'ñ kya'øyidi, wimbeets kugoots y'ejtnidi. <sup>22</sup>Øy ja yjawa'andi jøts ku ja wyijyaa'yidi, jade'ents ja yjatti pøn niti tkajajtip; <sup>23</sup>tøts ja t'ixwejtsidi ja Dios kyunuu'kxin, midi nijuuni kawindigøøpy, jøts ja tyikmøjtøkidi ja jaa'y yja' ja awanax midi windigøøpy ejtp, joon paat y'awanax, tsaa'ñ paat y'awanax, uk nayide'en øy midi jiyujk midi maktaxk ja tyeky.

<sup>24</sup>Yø'øgøjxpts idø'on Dios ja tø myajtstu'udyidi, jøts ja tø tpanøjkxti ja kyø'øm tsojkin ja kya'øwyinmaa'ñ (midi'iyim ja y'ijty y'ukjagyajptip), jøts jade'en tsø'ødyumbim y'adø'øtsti nixem

niyam; <sup>25</sup>ja ku ka'ap tjanchja'widi ja Dios tyiy'ajtin. Ja' ne'egi myibøjktip ja tum ja taay, jøts ja ja' tø twindsø'ogidi ja pikta'aky midi ja Dios tø t'ødyuñ, jøts ni ja Dios ne'egi kø'øm kyayikwindsø'ogi, pøn paat'ajtip amuum ja windsø'jkin. Jade'en idø'on ja y'ejxi tyiyi.

<sup>26</sup>Patyts idø'on Dios ja tø y'ixmachidi jøts ja jade'en y'am'adø'øtsti chaach'adø'øtsti; ja tø'øxyøjk paat ja tyiktigajtsnidi ja tyø'øxyøjk'ajtin, tum wimbet ttundi sam ka'ap pyaat'aty jøts ja jade'en y'adø'øtstit. <sup>27</sup>Jøts yaa'dyøjk nayide'enmidi; ka' t'uknitanaañidi ja yaa'dyøjk'ajtin ku ja tø'øxyøjk møøt, kø'ømyi ja tukyaa'dyøjk ñay'ejxkiyidi nixem niyam. Tukyaa'dyøjk ja axøøk y'adø'øtsti, ja ayo'onts idø'on ttagidajkidip jøts jade'en tyuktuñidi ku tkamøjpikta'akti ja Dios.

<sup>28</sup>Kumi ka'ap ja Dios tnijawiwy'a'andi, patyts ja tø myajtstu'udyidi jøts ja y'axøøkwinmaa'ñ tyikmajada'akti, jøts jade'en y'adø'øtstit sam ka'ap pyaat'aty. <sup>29</sup>Tum ja ka'øybi winmaa'ñ yjagyajtpip, ja kawindiy'ajtin ja axøøk'ajtin, y'ama'at'ajtkøjxtip o ti, ja ka'øy'ajtin y'amidip yjotpidip, windii'ñjaa'y'ajttip, yikjaa'y'o'ktip, kudsep yjaa'y'ajttip, win'øø'ndip jøts tum wenk øy pøn tnimadyaagidi.

<sup>30</sup>Ja pagajpxk ja' tyunk'ajttip, ka'ap ja Dios ttsokti, yjemjaa'yidi tyejaa'yidi, namyikaxi yjaa'y'atti. Tum ja ka'øybi wyinmaa'ñ'ajttip, ka'ap tyeety tyaak tmimadowdi, <sup>31</sup>ka'ap yja'gyukidi, ka'ap

y'ayuujk tpadundi, ka'ap yuyj'ajtin tjagyapti, ka'ap tjatti jøts myaa'kxuktit jøts ka'ap pøn t'ayo'ejxti. <sup>32</sup>Yjanija'widip wa'ats sa Dios tyikutuky; wa'ats tjanijawidi pøn jade'en adøtstip jøts ku ja kyudigø'ødyit xemikøjxp. Jøts nijade'en tkadamajtstu'utti, tyun'adøtstip jade'en jinaxy. Tyaxondaktip ku t'ejxti nayide'en y'adøtsmidi jadu'uk jadu'uk.

### Tiy'ajtingøjxp ja Dios tyiidyuñ

**2** Ja'agøjxp ka' mbaat'aty jøts ja myiktamaa'kxt øy sa mjawa'a'ñ, metsxi mbayø'øpy jadu'uk øy pøn, mdyimyjapøni mets. Ku jade'en m'adi'ich kø'øm mnadyanipiky ja ayo'on, mbayø'øpy jadu'uk jøts m'adøtspts jade'en kø'øm. <sup>2</sup>Nnija'windipts adøm jøts ku Dios tiy'ajtingøjxp tyiidyuñ ku ja ttukniduki ja ayo'on pøn jade'en adøtstip. <sup>3</sup>Jade'en mets yjawi mwani mduknawa'adsip mets ja Dios xijy ja ayo'on, metsxi mdanipijky ja mmigu'uk ja ayo'on pøn jade'en adøtstip, mja'adøtstip meets jade'en kø'øm. <sup>4</sup>Uk ka' idø'on xtsojki ja Dios y'øy'ajtin ja Dios tyuda'aky'ajtin, ni xkamøjpikta'aky jøts ku ja'abi øy'ajtin tyuñ jøts xmijotjimbett ja Dios jøts tyigatst ja mdsinaa'yin. <sup>5</sup>Møk ja mwinmaa'ñ xjagyepy jøts ka'anim xmijotjimbity ja Dios jøts xyiktigatst ja mdsinaa'yin. Kø'ømyi ja m'ayo'on xyikmiweni xyikajaji, midi nøjxk yikpatp yik'ejxp ku ja Dios ja tyiidyu'unin tiy'ajtingøjxp tyikme'ent, <sup>6</sup>ku ja ttagubatt tu'uk tu'uk sa jaty pønjabøn tø y'adi'ich. <sup>7</sup>Pøn tpaatwandip ja

kunuu'kxin ja øy'ajtin xondaajkin  
 midi xemikøjxp, jade'en'ampy  
 ku ejtp øy yikxon yjaa'y'atti,  
 ja'ats idø'on Dios mo'ojidip ja  
 jujky'ajtin midi xemikøjxp; <sup>8</sup>pønts  
 nay'ama'at'ajtiyip jøts ka' tpadundi  
 ja tyiiby yjanchpi, tum ja ka'øybi  
 tyundip, ja'ats ambøjkin'ampy  
 Dios tiidyunidip. <sup>9</sup>Møk  
 y'ayo'odit niduki'iyi, y'amjattit  
 chaachjattit pøn ka'øy'adøtstip,  
 ja israelit jaa'dyi jøts nayide'en  
 pøn ka'israelit jaa'dyi. <sup>10</sup>Pønts  
 øyjaa'y'ajttip wan t'israelitjaa'yidi  
 uk tka'israelitjaa'yidi, ja'ats ja Dios  
 mo'ojidip ja kunuu'kxin ja øy'ajtin  
 jøts ja windsø'jk'ajtin.

<sup>11</sup>Kumi ka' Dios pøn t'øy'ixy  
 tka'øy'ixy wan ja tponi; <sup>12</sup>pøni  
 pøn tkanija'widip ja kutujk midi  
 ja Moisés ja Dios Teety møyji piri  
 pøkyundip, nayide'en ja nøjx  
 wyindigøydi, ni ja kutujk kyatsokit;  
 pønts tjanija'widip ja Moisés  
 kyutujk jøts pyøkyun'adø'øtsti,  
 nay ja'abi kutujk ja jaayi nøjx  
 yiktatiidyundip. <sup>13</sup>Ka'ap ja Dios  
 tkupiky pøn nugo tmadoodip ja  
 kutujk jøts ka' tpadundi. <sup>14</sup>Ku  
 abiky jaa'dyi, pøn ja Moisés kyutujk  
 tkanija'widip, tyundipts ja øybi  
 midi ja Moisés kyutujk y'ane'emy  
 øy ja ja'abi kutujk tjagajagyapti,  
 kyø'ømgutujk ñamyayi yiktundip,  
<sup>15</sup>jabi yikwingaxø'ktipxi ja' sa jaty ja  
 yjaa'y'atti jøts ku ja kutujk tjagyapti.  
 Ja kyø'ømwinmaa'ñ ni'øøniyidip  
 sa y'øy'adø'øtsti kya'øy'adø'øtsti.  
<sup>16</sup>Ja'abi xøøw yiknijawit ku ja Dios  
 Teety tpikta'akt ja Jesucristo jøts  
 ttiidyu'unt niduki'iyi ja jaa'y ti jaty  
 pøn japøn tø ttuñ ayu'uch, sam ø tø  
 nnigajpxi ja yiknitsokpi ayuujk.

**Sa ja israelit jaa'y ja Moisés  
 kyutujk ñadyamøjiyidi**

<sup>17</sup>Mets wamp jøts ku me  
 israelitjaa'yi, jøts ku xpaduujni  
 ja Moisés kyutujk jøts  
 mnadyamikajxip ja mDios. <sup>18</sup>Wa'ats  
 xnijawi sa Dios ttsøky, jøts wa'ats  
 mduknijawiyi ja kutujk midi'ibi øy  
 midi'ibi tsuj. <sup>19</sup>Mnay'aja'wiyip jøts  
 ku xjaty xnøø'mo'ot xuu'mo'ot ja  
 jaa'y pøn wimbeets kugoots ejttip.  
<sup>20</sup>Mnay'aja'wiyip jøts ku xjaty  
 sa xyik'ixpøkt pøn tkanija'widip  
 pøn tkaja'gyukidip, pø japxi  
 kutujkjøtpy xkajts'ixy ja wejin kajin,  
 ja tyiiby yjanchpi. <sup>21</sup>Myik'ixpijkpy  
 ja mmigu'uk, ðti kuts kø'øm  
 xkatunjøpi sa ja m'ixpøjkin  
 xyikyø'øy? Ku mgajpxwa'kxy,  
 jade'en mwa'añ ku ka'ap y'øyi ja  
 maa'tsk, maa'tspts mets kø'øm,  
 ðtigøjxp ku kø'øm mmeech?  
<sup>22</sup>Mets mwamp jøts ku ka'ap  
 pyaat'aty jaa'y ñiyaa'y ñidø'øxy  
 ñabyøjkkxiyidit, jøts ðti'ajtp ku  
 jawyeen jade'en kø'øm m'adi'ich?  
 Ni mets kø'ømabaat xkatsøky ja  
 awanax, mwimaa'tsidipts ja  
 chaptøjk ti jaty ja yjagyepjy.  
<sup>23</sup>Mnadyamikajxip mets ja kutujk,  
 mmidundigøøpyts ja Dios ku ka'ap  
 jade'en xuñ sa ja kutujk wyaa'añ.  
<sup>24</sup>Paty idø'on ja Dios kyajpxy  
 wyaa'añ: "Pøn ka'israelit jaa'dyi, ja'  
 tka'ødyejtip ja Dios ku meets tum  
 jiwimbet xunguixy."

<sup>25</sup>Pø wan wine'enin xjanchyiktuñ  
 ja Dios y'ejxpajt mne'kxkøjxp ku  
 xpaduñ ja Moisés ja kyutujk, kuts  
 ja ka'ap xpaduñ, jade'en ja tpaaty  
 ejxim ja ejxpajt jeexyip xkamøø'taty.  
<sup>26</sup>Pønts ja ejxpajt kyamøøt jøts

pyadumpy sa ja kutujk wya'añ, jade'en ja tpaaty jøts ku ja ejxpajt ja jeexyip tmøødi, øy ja windii ja ejxpajt yjagayiktu'unxinim.

<sup>27</sup> Pønts ja ejxpajt ka'ejtxip jøts pyadumpy ja kutujk øy ja køøm tka'ixpiky, mdabayø'øyip mets ja' ku xkabaduñ ja kutujk, øy mets ja jap xa'ixy jøts ku ja jap kyøxja'ayi jøts øy mets ja ejxpajt xjamøøt'aty.

<sup>28</sup> Ka'apts ja jade'en tijy jøts ku ja y'israelitjaa'yi pøn jade'en nugo nikijxy nanky'ejxip, jøts ni ja' ka' yik'ejxpajtijy midi nikijxy ja'ayi yiktump. <sup>29</sup> Ja' idø'on israelit jaa'y pøn amuum tpadump, jøts ja' ejxpajtin'ajtp midi yikwinmaapy am jotp, jam anmija'wingøjxp, midi ka'ap ma kyøxja'ayi, midi ka'ap ma kyaxi'iky. Pøn jade'en tpadump, kupiky ja y'ity jam Dios wyingujkp, kidi jaa'y wyingujkyip.

**3** ¿Tiku yikajpxy ja israelit jaa'y? ¿Ti wya'añ ja ne'kxkøjxpit ejxpajt? <sup>2</sup> Janch møk yjapaat'atyidi ja'agøjxp ku ja' ja Dios kyajpxy y'ayuujk tyami'ajot'ajtidi jøts ja tpadu'undit. <sup>3</sup> ¿Tits idø'on ja'adi? Øy ja tkabadundi jade'en, ¿winets ja Dios tmajtstu'utt ja y'øy'ajtin? <sup>4</sup> iNiwindem! Jinaxy ja Dios tyiktuñ ja tyiiby yjanchpi, øy ja jaa'y niduki'iyi yjataayidi; jabi yide'enxi ja Dios Teety kyugajpxy tnimadyaajky ja Dios Teety:

Ja mgøøm'ayuujk me Dios Teety myika'pxytiidyumbipidsøjmip, ku wyinaty nugo mwinnmaa'ñ'ijxyidi ja'adi pøn mgamøjpktaajkiyip.

<sup>5</sup> Sam winaaagin wya'andi yide'en: ku adømbøkyøjxp tijy ja Dios ja y'øy'ajtin tyiknigaxi'iky, ¿sats adøm

idø'on ja'abi ayuujk nja'gyukandit? ¿Ka' idø'on ja Dios y'øyi ku ja nyikjotmajtyindi, jøts ja ayo'on xjaniguejxyindi? <sup>6</sup> iNi juuni ka' yjade'eni! Ku Dios jeexyip kya'øyi, ¿sudsots ja jeexyip ttiidyuñ ja naxwii'ñit jaa'y?

<sup>7</sup> Jøts kuts øts nbøky jeexyip yjanchtuñ jøts ja Dios tyiy'ajtin tyikwingaxø'økt, ¿sudsots ø nyikpøky'ixy jøts ku øts nbojkitumbijaa'yi? <sup>8</sup> ¿Winets ja tum øy wyimbejtxit ku pøn ttuñ tum ja ka'øybi? Jade'en ja jaa'y winaaagin kya'øwyinmaydi jøts wya'andi, jøts ku ja'abi øøts jade'en ndukni'ixpøki. Yø'øbi jaa'y paat'ajtidip ja ayo'on.

#### Niduki'iyi ja pøky xaja'jtyindi

<sup>9</sup> ¿Tits adøm idø'on? ¿Ku adøm n'israelitjaa'yindi, paty adøm jawaani njaaktyimy'øyindi, jøts nika' pøn jade'endi? iKa'ap yjade'eni! Pø tøxi nnigajpxy jøts ku tum ja pøky yik'adsøøni, wan t'israelitjaa'yidi uk wan tka'israelitjaa'yidi. <sup>10</sup> Ja'agøjxpxi jap nøkyijpxy yide'en wya'añ:

Ka' pøn y'øyi, nitu'ugin kya'lity pøn øy;

<sup>11</sup> nipøn kyaja'gyuki,

nipøn tkanijawiwya'añ ja Dios.

<sup>12</sup> Tum ja wenk tuu' tø tpøjknidi, windigøy ni'ijtyi yjatti.

Ka' pøn tjotmay'aty ja øwyinmaa'ñ, ok idø'on tu'ugin ja'abi twinmaa'ñ'att.

<sup>13</sup> Tum ja axøøk kajpxy pidsømp y'aawjotpy yukjotpy;

ja win'øø'nk ja'ayi majyip. Wingajpxnajxpxim kyajpxy;

<sup>14</sup> tum ja ka'øybi kyajpxpidsømdip, kixy kyubety wya'andi.

<sup>15</sup> Jøts ja'ayi majyidip ku tnibutti  
 tniga'akti ja yikjaa'y'oo'k;  
<sup>16</sup> ja' tyunk'ajttip ku  
 yikudigø'odyit ku  
 y'ayo'ondu'undit,  
<sup>17</sup> jøts ka' tnijawidi ja øy'ajtin ja  
 tuda'aky'ajtin.  
<sup>18</sup> Niwine'enin tkawinmaydi jøts  
 twindsø'ogidit ja Dios.  
<sup>19</sup> Jøts yiknija'wip sa jaty ja  
 Moisés kyutujk wya'añ, ja'ats  
 ja yikta'ana'amdip ja israelit  
 jaa'dyi pøn ja tø yiktanibiktaagidi,  
 ja'agøjxpts ne'egi amøni tyim'yettit,  
 jøts jade'en niduki'iyi ja naxwii'ñit  
 jaa'y tpaattit ja Dios tyiidyu'unin;  
<sup>20</sup> nipøn ja Dios tka'øy'ext øy ja tø  
 tjabaduñ midi ja kutujk ñi'ane'empy,  
 jøts ja'ayi ja ñigajpxpy ku adøm  
 nbojkitumbijaa'yindi.

**Janchja'wingøjxp ja  
nitso'ok'ajtin yikpaaty**

<sup>21</sup> Jats jadu'uk ja  
 winmaa'n sa Dios xkupøjkin.  
 Yjadyimyjanigajpxpy ja Moisés  
 ja kyutujk ja kø'øm, jøts nayi tø  
 ja Dios kyugajpxy ja nayide'en  
 tnigajpxti. <sup>22</sup> Ja' idø'on ja Dios  
 Teety kyupijky pøn tjanchja'widip,  
 pøn t'ajot'ajttip ja nwindson'ajtim  
 Jesucristo; kyupijky ja øy pøn,  
 ka'ap ja pøn jadu'uk jadu'uk  
 twenk'ixy, <sup>23</sup> niduki'iyixi jaa'y  
 pyøkyundi, jøts ka'ap pøn tminaxy  
 ja pyøky jam Dios wyingujkp.  
 Jagam jixkø'øm ndsinaa'yindi, ni  
 sudso'ampy ja ñitso'ok'ajtin ja  
 ngapaajta'am. <sup>24</sup> Ejxim ja Dios Teety  
 y'øyi ku ja jaa'y tyiknitso'ok'aty  
 nwindson'ajtim Jesucristo  
 køjxp, jøts jade'en tmay'aty ku  
 tkupiky. <sup>25</sup> Ja Cristo ja Dios Teety

pyiktaajk jøts ja tkudanaajyit  
 ja naxwii'ñit jaa'y pyøky ku ja  
 tku'oogit. Winets wyingaxi'ikñim  
 adøm ja nitso'ok'ajtin ku ja  
 njanchja'win, jøts ja Dios Teety  
 jade'en xuknija'win ja y'øy'ajtin  
 ja tyuda'aky'ajtin, jøts ku ja  
 tkadagubety ja øky midi tø yiktuñ  
 jawyeen ku ja nwindson'ajtim  
 tkagu'ooginim ja øky. <sup>26</sup> Ja'agøjxp  
 jade'en yjaty jøts nnija'win jøts  
 ku Dios Teety y'øy'ajtin tyiy'ajtin  
 tyik'awa'añ, jøts ejtp jade'en øy  
 juuni tkupiky pøn tjanchja'widip ja  
 nwindson'ajtim Jesús.

<sup>27</sup> ¿Mats ja namyikaxi tyuñ? Pø  
 ka'axi ja tyuñ ku ja janchja'win  
 njagyajpin, ku njanchja'wyin ja  
 nwindson'ajtim. Ja' ja tyiktundip  
 pøn tta'odyøkiwyandip ja tunk ma  
 Dios, ku ja kutujk nadyiyi tpadundi  
 pøn ja janchja'win tkajagyajtpip.  
<sup>28</sup> Jade'ents yik'ixy yiknijawi jøts ku  
 janchja'wingøjxp ja jaa'y yikupiky  
 jam Dios wyingujkp. Ka'ap ja  
 yikpayø'øy pøni sa ja tø tpaduñ  
 tkabaduñ ja kutujk sa ja y'ane'emy.

<sup>29</sup> ¿Ti ja israelit jaa'y nugo ja  
 Dios Teety y'ejx'ijtpy, jøts ja ka'ap  
 t'ejx'ity pøn ka'israelit jaa'dyi?  
 Ka'ap yjade'eni, pø tum ja'axi  
 amuum tja'ajtp. <sup>30</sup> Tu'ugyi Dios,  
 ka'ap ja Dios kyawinaagi; jøts  
 pøni pøn tmøøt'ajtp ja janchja'win,  
 ja'ats ja Dios kyupijky, wan  
 tmøøt'aty uk tkamøøt'aty ja  
 ejxpajt ñe'kxkøjxp sam ja israelit  
 jaa'dyi. <sup>31</sup> ¿Ja'agøjxp adøm ja  
 kutujk nga'ukpadu'unindit ku ja  
 janchja'win nmøøt'ajtyindi? Ka'ap  
 yjade'eni, jabi jade'eni ne'egi  
 ka'pxy ja kutujk yikpaduñ ku ja  
 Cristo njanchja'wint.

### Sa ttunjöpi ja Abraham

**4** ¿Ti adöm n'apteety'amöj Abraham tyuun jöts Dios ja ojts kyupiky? <sup>2</sup>Ku jeexyip ja Abraham ja'agøjxp ja Dios kyupiky ku ja wyinaty tø ttuñ tigati, nadyamøjiyipts ja jeexyip. <sup>3</sup>Yide'ents jap nøkyijxpy wyä'añ: "Ojts ja Abraham tjanchjawi ja Dios, ja'ats ja Dios y'øyja'wiyii'n jöts ja ojts tkupiky." <sup>4</sup>Ku pøn øy ti tunk ttuñ jöts ku ja yikmijuy, ja tyunkts ja yiknimiju'uyip, ka'ap ja niñamyay'ati tpaaty, ja' ja kyudøjkip ku ja tø tyuñ. <sup>5</sup>Pønts ja tunk tkada'ødyøjkip ma Dios, øy ja ti tjagatuñ, jöts ku ja ja'ayi tjanchjawi ja Dios ku ja pojkpitumbi jaa'y ja tpojkpimee'kxy, ja'ayi ja Dios tyajotkujk'ajtpy ku ja tjagyepy ja janchja'win, jöts ja tmay'aty jade'en ku ja tkupiky. <sup>6</sup>Nayide'en ja David ojts wyä'añ ku ja ojts tñigajpxy sa ja jaa'y xyonda'aky pøn ja Dios kyupijxpy, jöts ja ka' tmøjpikta'aky pøni sa ja jaa'y tø y'adi'ich. <sup>7</sup>Yide'en ja wyä'añ:

Nekim ja jaa'dyi pøn ja Dios ttamaa'kxidip ja tyundigø'øyin, jöts ja ka'ap myøjpiktaajxxyidi ja pyøky.

<sup>8</sup>Nekim ja' pøn ja nwindson'ajtim pyøjkpimee'kxpy.

<sup>9</sup>¿Ja'ayi dø'on nugo jade'en nekim t'ejxtip pøn ttundip ja ejxpajt ñe'kxkøjxp, uk nayide'en idø'on ja'amidi pøn tkatundip ja ejxpajt? Nnija'windipts jöts ku ja Abraham ja'agøjxp ja Dios ojts kyupiky ku ja ja'ayi tjanchja'wi. <sup>10</sup>¿Juunits idø'on ja jade'en yikupijky? ¿Tø

wyinaty ja Abraham jawyeen ja ejxpajt yikpiktaajki, uk ka'aním? Ka'anímts ja wyinaty ttuñ ja ejxpajt. <sup>11</sup>Oojknim ja Abraham ojts yikpiktaajki ja ejxpajt ku ja ojts yiktsuky ja ñe'kx, ejxa'an ja wyä'añ jöts ja yiknijawi ku Dios ja tø kyupiky yjanchja'wingøjxp. Jade'ents ja Abraham ttunjöpiyii'n, jöts ja nayide'en niduki'iyi janchja'wingøjxp yikupøkti øy ja tmøøt'atti tkamøøt'atti ja ejxpajt ñe'kxkøjxp. <sup>12</sup>Janch jade'en ku ja Abraham idø'on kyudanaabyi'ajtp pøn ja ejxpajt tmøøt'ajttip, kidi ja'agøjxpip ja ja'ayi ku ja tø yiktu'unxidi ja ejxpajt. Jade'en'ampy ja tijy jöts ku ja tpa'ejxti, jöts ja nayide'en tjagyapti ja janchja'win sa ja Abraham, ku ja wyinaty ka'aním ja ejxpajt yiktu'unxi.

### Jaa ja Dios y'aduky ja kyajpxy ku ja yikjanchjawi

<sup>13</sup>Jade'en ja Dios wyanda'aky, jöts ja Abraham møøt niduki'iyi wine'enin ñajtska'axidi yikmo'odit amuum ja naajx kajp wine'en y'ity naaxwiin; kaja'agøjxpipts ja wanda'aky ojts yikpikta'aky jade'en ku ja kutujk ja wyinaty ka'pxy tø tpaduñ ja Abraham, pø jade'en'ampyxi ja jade'en ku Dios ja tjanchja'wi, jöts ja' ja wyinaty tø tyagupiky. <sup>14</sup>Jöts ku jeexyip ja'ayi yikupøkti pøn tpadundip ja Moisés kyutujk, jöts ja'ayi jeexyip yikmo'odi ja Dios y'øy'ajtin, ka'ats jeexyip tyuñ ja janchja'win, jöts ni ja Dios jeexyip ja wyanda'aky niti kyawa'añ. <sup>15</sup>Pø tiidyumpxi ja kutujk; mats ja kutujk kya'ity, ka'ap

jam ti yikmidundigø, jabi niti ana'amínxi jam.

<sup>16</sup>Jade'en'ampyts idø'on Dios ja twandaajky ja'agøjxp ku ja janchja'win ojts t'ixy, jøts ja tmay'att niduki'iyi pøn nayide'en ja janchja'win tjagyajp sa ja Abraham. Kidi ja'ap ja Dios tyamiwandaajki ja y'øy'ajtin pøn tpadundip tkabadundip ja kutujk, pø ja'axi tyamiwandaajki pøn tjanchja'widip ja Dios sam ja Abraham ttunjøpiyii'n. Jade'ents idø'on ja tpaaty, ja' ñamyayi tñigubajk'ajtp ku ja jade'en ojts tjanchja'wi ja Dios, jøts ja' adøm ñamyayi ndeety'ajtyindip <sup>17</sup>jam Dios wyingujkp, pø nayi Diosxi ja yjanchja'wiyii'n ku wya'añ ja Dios kyajpxy: “Tø me nbikta'aky møjaa'y'ajtpi o ma'et o magajp.” Janch møj ja Dios, øy ja tyikjujukpyøkt pøn tø y'oo'kni tyigøøni, jøts nayide'en tñanky'ijxyi o ti pikta'aky midi ka'ejtpnim.

<sup>18</sup>Øy ka'ap ti jøp'ejxin, ka'ap ti winmaa'n, ojtsts ja Abraham ja tjanchjawí jøts yjøm'ijxpy ja', xjats idø'on ja jade'en may jaa'y ñamyayi tñigubajk'aty sa u'nkteety y'u'nk y'una'jk tñideety'aty, jade'en sa dø'on Dios ja wyinaty tø ñii'mxyi ku ja wya'añ: “Janch may ja m'u'nk m'una'jk xpaatt.” <sup>19</sup>Magø'pxy ja Abraham wyinaty ja yjumøjt jøts ka'ap ja sa tijy, amuum ja t'ajot'aty øy ja ñidø'øxy Sara ja møøt tø yjamøjaa'yinidi, ka'ap ja y'u'nk y'una'jk t'ukpatnidi. <sup>20</sup>Ka'ap ja sa tijy, ka'ap ja tka'øyja'wiyi ja Dios wyanda'aky, ne'egi ja amumjoojt tpiktaajky ja yjanchja'win jøts ja tmøjawi tkunuu'kxyjawi ja

Dios, <sup>21</sup>jøts ja tu'ugyi tjøm'ijxy jade'en jøts ku Dios tjagyepy møk'ajtin, jøts ja ttu'unt jade'en sa ja wya'añ. <sup>22</sup>Jade'en'ampy ja Dios ja ojts kyupiky ku y'ijxyi jøts ku myajada'aky ja yjanchja'win.

<sup>23</sup>Jøts ku dø'on Dios ja jade'en tkupijky ja yjanchja'win, kidi ja Abrahamip ja ja'ayi kyupøjkíp jøts ja jade'en yikjaadya; <sup>24</sup>pø nayide'enxi adøm ja xkupijkyim ku adøm ja Dios Teety njanchja'want. Pø ja'axi tø tyikjujukpyiky jadigojk xemikøjxp ja nwindson'ajtim Jesucristo, <sup>25</sup>pøn ojts yikøyaky jøts y'oookt adøm nbøkyøjxp, jøts jade'engøjxp ojts xemikøjxp yjukpyiky jadigojk jøts adøm nyikupøjkint jam Dios wyingujkp.

#### Øwyimbidsimy ku xkupøjkint ja Dios

**5** Kuts ja Dios Teety xkupøjka'an ja njanchja'win, jøts jade'en ja nmiduda'aky'ajtin ja nwindson'ajtim Jesucristo køjxp. <sup>2</sup>Ja'agøjxp adøm ja Dios Teety møøt n'ijtyindi ku ja nwindson'ajtim njanchja'windi, paty adøm ja xkunuu'kxyindi. Ja' adøm xyik'ejtindip tu'ugyi ja nwinmaa'n jøts ja xondaajkin xmø'øyindi, jøm'ijxy nyik'ijtyindi jøts ku ja nbaajta'andit amuum ja y'øy'ajtin. <sup>3</sup>Jøts nayide'en adøm ja ka'ap nwandijyindi ja ayo'on, øy adøm ja ngu'ayo'owa'andi jotkujk; pø nnija'wandipxi adøm ku n'ayo'owan winets ja tuda'aky'ajtin nbaajtindit, <sup>4</sup>jøts ja tuda'aky'ajtin ja' øy xyikwingaxø'jkindip, ja' xukjøm'ijxy'ajtindip midi ja Dios tø xanibiktaajkandi. <sup>5</sup>Jøts ka'ap majtsk'aaw majtskjoojt n'ejtindit,



pø tøxi ja Dios amuum xmø'øyim ja y'øy'ajtin ja pya'ayo'owin ku ja tø xuktatøjka'am ja y'Espiritu Santo.

<sup>6</sup>Ku adøm wimbeets kugoots nmijajtyim ja nbøky, niti nitso'ok'ajtin kø'øm ngapaajtyim, xjats ja Cristo tø myiñ winet, jøts ja tø tkudani ja ka'øyjaa'y pyøky ku ja tø y'øøky. <sup>7</sup>Ka'ap pøn nugo tnigyu'oogi jadu'uk, ni jade'enbaat øy pøn mabaat yjadyimya'øyjaa'yi; pø wants winaagin pøn ñay'a'ejxyit jøts ja tku'oogit. <sup>8</sup>Xjanchojkimpts adøm ja Dios ku adømgøjxp y'øøky ja nwindsøn'ajtim Jesucristo, øy adøm njapøjkpitumbijaa'yandi.

<sup>9</sup>Jøts tøts ja Dios xkupijkyim ja nwindsøn'ajtim Jesucristo pya'ayo'owingøjxp ku ja tø xku'o'jka'andi, jøts ne'egi jīnaxy ja nøjcx xuknitso'ok'ajtyindi ja møk ayo'on, jøts ja ka'ap xuku'o'jka'andit ja nbøky, ja'ayi nwindsøn'ajtim Jesucristo køjxp.

<sup>10</sup>Njagami'øy'ajtyindip adøm ja Dios, jøts adøm ja jade'en xjaaktuu'mø'øyindi sudso ja jadigojk nmijotjimbejtindit, ja'agøjxp y'ø'jky ja y'U'nk adøm nbojpkikøjxp. Mats ku ja ixyam yjujky'aty xemikøjxp, jøts ku adøm ja tø nmijotjimbijtyindi ja Dios, ¿ti jats adøm ndejint ja winet xka'ukyiknitso'ok'ajtna'ant'?

<sup>11</sup>Xon'ejtnamdip adøm ixyam ja'agøjxp ku ja nwindsøn'ajtim Jesucristo tø xukmigu'ukwa'añim jadigojk ja Dios Teety.

### Ja Adán jøts ja Cristo

<sup>12</sup>Jøts tu'ugyi ja jaa'y pøn pøkyun'okwaañ ya naxwiñ, jøts ja o'jkin tigø'øyin jade'en'ampy

ñaxkidaajky, niduki'iyi øy pøn pyaadyi ja'agøjxp ku ni'ijtyi nayide'en tø pyøjkpitunidi. <sup>13</sup>Ku ja kutujk wyinaty kya'itynim, jaayim ja pøky wyinatyni ya naxwiñ; jaa ku ja Dios ka' tpayø'øñim, pø ka'animxi ja kutujk wyinaty te. <sup>14</sup>Ku ja et ja xøøw ñajxy midi tso'ondaajk Adán ñikøjxp jøts yjøpkixy Moisés ñikøjxp, jøts wine'en pøn pyøkyundøø, ja' idø'on ja o'jkin tigø'øyin mimajadaajkidøø, øy ja tjagajagyapti ja'abi pøky midi ja Adán tyuun ku ja tkamimadøøy ja Dios; sa ja Adán tyiktso'ondaajky ja pøky, nayide'ents ja tu'ugyi myenwami wyinaty pøn ja øy'ajtin nitso'ok'ajtin xukpaajtmandip, xjats tø myiñ ja nwindsøn'ajtim Jesucristo.

<sup>15</sup>Windemts ja møøt n'uk'ejxkijpxyñ ja Adán tyundigø'øyin møøt ja Dios y'øy'ajtin midi ja xmø'øyindip. Tu'ugyits ja jaa'y pøn ja pyøky tø xukno'jka'andi niduki'iyi jøts windigøy n'ejtna'andi; jøts tu'ugyi ja nayide'en ja nwindsøn'ajtim Jesucristo pøn ja Dios xuknitso'ok'ajtindip ja nbøky, jøts ka'ap ja pøn tmi'abaaty, namay adøm nyiktamay'ajtyindi ja nitso'ok'ajtin jøts adøm ja xmø'øyindi. <sup>16</sup>Ti'in ja ndami'a'ejxin ja tu'ukpi jaa'y pyøky møøt ja Dios ñitso'ok'ajtin. Tu'ugyi ja tundigø'øyin ja'ats yikpayø'øpy jøts tø nbøkpyajtkijxyindi; kuts ja Dios xmø'øyindi ja nitso'ok'ajtin, tyamay'ajtpy ja jaa'y ja ñamyayi jøts ja xkupijkyin, øy wine'en tø njapøjkpitu'uñindi. <sup>17</sup>Ku ja tu'ukpi

jaa'y tɔ pyojkpituñ, ja'agɔjxpts ja o'jkin myajada'aky jɔts ja yikudigɔy, mɔjts ja Dios jɔts ja ttuñ ja may'ajtin, jɔts ja tyaky ja myɔk'ajtin midi yikjujky'ajtp xemikɔjxp ku tu'ugyi njanchja'want ja nwindson'ajtim Jesucristo.

<sup>18</sup>Jade'en sam ja Adán pyɔkyɔjxp ja jaa'y ttukpaatkijxy ja kudigɔ'ɔyin, nayide'en ja nwindson'ajtim Jesucristo y'odyu'uningɔjxp ttukpaajty niduki'iyi ja naxwii'ñit jaa'y ja nitso'ok'ajtin, jɔts ka'ap ja mɔk tiidyu'unin tpaattit pɔn jaty tjanchja'widip. <sup>19</sup>Tu'ukts ja jaa'y pɔn kamadoow, jɔts ja'agɔjxp ja pɔky xaja'atkijxyindi; nayide'ents ja tu'ukmi pɔn tuki'iyi tmimadoow ja Dios Teety, jɔts ja'agɔjxp adɔm nyikupijkyindi jam Dios wyingujkp.

<sup>20</sup>Jɔts ku ja kutujk yikpiktaajky, ja' ja yiktanibiktaajkiyiñ jɔts ja pɔky wa'ats yik'ejxkapt; jɔts ja pɔky mɔjtak'adɔtsp ja', jinaxys ja Dios y'ɔy'ajtin myɔk'ajtin tyikmɔji'adi'ich nayide'en. <sup>21</sup>Sam ja pɔky myajada'aky ku ja tyiknaxkida'aky ja o'jkin tigɔ'ɔyin, xjats ja Dios ja y'ɔy'ajtin nayide'en tyikmajada'aky sudso ja xkupɔjkin, jɔts ja nwindson'ajtim Jesucristo kɔjxp xmɔ'ɔyindi ja jujky'ajtin xemikɔjxp.

**Ka'ap ja pɔky myajada'aky ku ja Cristo yujky'ajtin nmɔɔt'ajtyindi**

**6** ¿Tits njaaktu'unindip? ¿Jaaktyimbyɔktyun'adɔjtsindip adɔm idɔ'ɔn ja'agɔjxp ku tɔ nnija'windi jɔts ku ja Dios xu'unxim ja may'ajt ku ja xpojkpimee'kxyindi? <sup>2</sup>iKa'ap jade'en pyaadyi! Pɔ tɔxi adɔm

nmajtstuuptyindi ja pɔktyu'unin; ¿jɔts sudso adɔm jade'en nbɔktyun'adɔjtsin? <sup>3</sup>¿Ti ka'ap xnijawidi ja nnɔbajtin, ti ja tyijpy? Pɔ ja'agɔjxpxi adɔm tɔ nnɔbejtyindi jɔts nmɔɔt'ejtindit ja nwindson'ajtim Jesucristo, jɔts yiknijawit jɔts ku adɔm ja nbɔky ja tɔ xmi'o'jka'andi. <sup>4</sup>Mɔɔt adɔm ja Cristo ñamyayi nnaɔjka'andi jɔts ja mɔɔt n'ɔɔky'ijtyindi, jɔts ku ja yujkpyijky xemikɔjxp jɔts adɔm nayide'en nbajtma'an ja jemchinaa'yin midi ixyam jɔts midi xemikɔjxp, sam ja Dios Teety ja tyukmimadaajkɔ ja o'jkin, jɔts ja myɔk'ajtin myɔ'ɔyi, jɔts ja yujkpyijky xemikɔjxp. Nay ja'ats idɔ'ɔn yiktump ku ja nɔbajtin yikpaaty.

<sup>5</sup>Pɔni tɔdamts adɔm ja Cristo nmɔɔt'ɔ'jkyim nayide'en sam ja o'jkin ja tɔ tpaaty, nmɔɔt'ijtyindipts adɔm ja', jɔts ku ja yujkpyiky xemikɔjxp jɔts nayide'ents adɔm ja nmɔɔtjujkyjxkma'andi. <sup>6</sup>Nnija'windipts adɔm sa jaty tɔ njaa'y'ajtyindi, jɔts ja' ja Cristo myi'o'jk jam kruskɔjxp, jɔts adɔm ja nbɔky xniwaajchim jade'engɔjxp ku ja y'ɔ'jky, jɔts ja ka'ap x'ukmimadaajkna'am, jɔts ja ka'ap jade'en n'ukmidu'una'ant sa jaa'y ja wyindsɔn tmiduñ, jade'en ja pɔky ñamyayi yikmiduñ. <sup>7</sup>Pɔnts tɔ y'ɔɔky, tɔts ja pɔky ja ñiwaajtsniyi. <sup>8</sup>Pɔni nmɔɔt'ijtyindip ja Cristo ɔy ja mɔɔt nja'ɔ'jkyim, njɔp'ijxy'ajtyindipts ja' jɔts ku ja mɔɔt njujky'ajtindit xemikɔjxp, <sup>9</sup>pɔ nnija'windipxi jɔts ku ja Cristo tɔ yujkpyiky xemikɔjxp, nijuuni kya'uk'oo'knit,

nijuuni kya'ukmimadaajkniiyt ja o'jkin. <sup>10</sup>Tuk'o'jkyi ja ja'ayi ttuku'o'jkiyii'n amuum ja pøky; jøts ja ixyam xemikøjxp yjujky'aty amuum ja Dios Teety tmøøt'ity. <sup>11</sup>Jøts nayide'ents meets idø'ønmidi, øøky tigøy ndejint mnabyikta'agiyidit jøts ja pøky jade'en xkayikmøj'attit, wijy kejy meets ne'egi mnabyikta'agiyidit ku ja Dios yja' xpaduujnidit, ja'agøjxp ku ja nwindson'ajtim Jesucristo xmøøt'atti.

<sup>12</sup>Paty ka'ap mbaat'atyidi jøts nugo xyikmajada'aktit ja mbøky ja mga'øwyinmaa'n, øy sa mduktunwa'añidi pøni sa ja ttsøky. <sup>13</sup>Kidi mnagyøyakyidi ma pøky, jøts ja kidi mduktuñidi ja ka'øy'ajtin. Ne'egi amuum mnayoxidit ma Dios, jøts ja mduktunidit tum ja øy'ajtin. Ka'ap meets ja pøky xukmijuky'ajtnit, jabi tøxi meets ndejint tø m'ats'øøky, jøts tø mjujkyøkti jadigojk, jøts ja juky'ajtin tø xpaatti midi xemikøjxp. <sup>14</sup>Jøts ja pøky ka'ap meets ja m'ukmimajadaajkniiyt, pø kidi ja Moisés kyutujkipxi meets mnitanaajyip, ja Diosxi meets ja kyunuu'kxin mdanitanaajyip.

**Ja ejxpajt madya'aky ku ja jaa'y ja wyindsøn aguwani tmiduñ**

<sup>15</sup>¿Sudsots adøm?

¿Jaaktyimbyøkyun'adøjtsindip adøm ja'agøjxp ku ja Dios xanitanaa'yindi ja y'øy'ajtin, ku adøm ja kutujk ka'ap xiidyu'uñindi? <sup>16</sup>Jøts mnija'widipts wa'ats ku tu'uk ja windsøn x'ukmidundøkidit, tu'ugyits ja xwindsøn'attit jøts ja' kuwani mmimado'odip, pø

ja'axi wyinaty mdumbi'ajtidip. Nayide'ents idø'øon tpaaty ndejint ku ja pøky xmimado'odit, ja' meets idø'øon ndejint windsønbojknip øy ja yjayik'øøky yjatyiktigøy, uk nayide'ents ku tu'ugyi ja Dios xmimado'odit jøts jade'en xu'undit sa ja ttsøky. <sup>17</sup>Janch møj ja Dios ku ja y'ixpøjkin xpaduujnidi midit tø myiktagidøkidi, jøts ja pøkytunk tø xmajststu'utti midit y'ijty niwa'añ myik'ejtniyidip. <sup>18</sup>Tøts ja pøky mniwa'achidi ku ja ka'ap m'uknimajadaajkniiydi, jøts tø xpatwa'j'kidi ja øy'ajtin midit ja Dios yja'ajtpy. <sup>19</sup>Jade'en ndukmadowdi sa ø najtsjawi xmadodø'ødit, jøts nayide'en xnadyamiyoxidit ja Dios. Sam y'ijty mnagyøyakyidi amuum jøts xundi ja ka'øy'ajtin ja axøøk'ajtin, nayide'ents idø'øon amuum ja Dios xnadyamiyoxidit, jøts xuujnidit ja y'øy'ajtin jøts amuum xmøøt'ettit ja Dios, tu'ugyi xagødøkidit ja mdsinaa'yin.

<sup>20</sup>Ku meets ja pøky y'ijty mganiwa'achinim, ka' meets y'ijty xuujni ja Dios yja', ja tiy'ajtin øy'ajtin; <sup>21</sup>jøts çti jade'en tø xpøkti? Mdatsø'ødyundip ja ixyam jadigojk, pø ja'ayixi ja yajkpy ja o'jkin tigø'øyin. <sup>22</sup>Kuts tø mniwa'achidi ja pøky jøts ja Dios y'øy'ajtin tyiy'ajtin tø xpadøjkiyidi, yø' tiy myiktu'undip, yø' mmo'o'jdidip sudso xmøøt'ettit sudso xmidu'undit amuum ja Dios, jøts xpaattit x'ejxtit ja juky'ajtin xemikøjxp. <sup>23</sup>Ja o'jkin tigø'øyin, ja' ja pøky ja'ayi yajkpy. Kuts ja Dios møøt, ja juky'ajtin ja Dios xamay'ajtimp midit xemikøjxp yikpatp, ku møøt n'ejtin ja nwindson'ajtim Jesucristo.

Amajtsk'ajtingøjxp tu'uk ja  
 eixpajt madya'aky pyidsimy

**7** Mee migu'uktøjkti, meets  
 mnija'wip sa ja kutujk  
 wya'añ, jøts mnija'wip jøts ku ja  
 ya ja kutujk tmøø'taty ja møk'ajtin  
 ku jaal'y jaagya yjujky'attinim.

<sup>2</sup>Ku n'ukpiktaajkint, ku tu'uk  
 ja tø'oxyøjk y'amajtsk'aty,  
 kutujkøjxpts ja tmøø'tamajtsk'aty  
 ja ñiyaa'y pøni jaakjujky'ajtpnim  
 ja'; kuts ja y'øøky ja ñiyaa'y jøts  
 ja nayide'en ja kutujk ñiwa'achi,  
 ku y'øøky pøn ja y'ity møøt  
 y'amajtsk'aty. <sup>3</sup>Kuts ja tø'oxy  
 jadu'uk yaa'dyøjk t'adsøy jam ja  
 ñiyaa'y yjajuky'atynim, pøkyts  
 ja tyumpy; kuts ja kyu'øøgyi,  
 niwaajtsip ja kutujk ja', øy ja møøt  
 jadu'uk ja yaa'dyøjk y'amajtskit,  
 jøts ka'ap ja pyøkyi.

<sup>4</sup>Jade'ents mee migu'uktøjk  
 idø'ønmedi pøni niwine'en ja Cristo  
 mja'atyidi, myikniwa'atsajtniyip  
 meets ja Moisés kyutujk, tøxi mee  
 ñamyayi ku'øøky mdañ ku ja  
 pøky tø wyindigøy jøts ja wenkpi  
 xpadøkidi. Ja Cristo meets ixyam  
 mja'ajtniyidip pøn jujkyøjk  
 xemikøjxp, ja'agøjxp ja yjajty jøts  
 jade'en'ampy nmidu'unindit ja  
 Dios. <sup>5</sup>Ku adøm y'ijty pøky y'agujkp  
 ndsinaa'yimnimdi, jøts ja kutujk  
 ja' ja wya'añ jøts ja tyikjinaxy  
 adøm ja nga'øwrynmaa'ñ, ku  
 ja ngabadu'uñindi jøts ja niti  
 nitsø'ok'ajtin xkadukjøp'ijxyindi.

<sup>6</sup>Ixyamts tø xniwaajchim ja'abi  
 kutujk, tø ja ñamyayi ngu'ø'jkyim  
 jøts ja tø xuk'ixmajchim ja  
 myøk'ajtin; jøts adøm tø  
 n'awa'atšpidsø'ømyindi, tu'ugyits

nmidu'unint ja Dios jøts ja  
 y'Espíritu Santo ja jemy jujky'ajtin  
 xukmi'ejtint midi xemikøjxp, jøts  
 ka'ap ja'abi møjaa'gyutujkin  
 x'uk'ana'amnandit midi y'ijty  
 nbadu'uñindip.

**Ja pøky midi xmi'ejtp**

<sup>7</sup>¿Wa'aním jøts ku ja kutujk  
 pyøkyi? ¡Ka'ap! Ku jeexyip ja kutujk  
 kya'ity, ka' øts jeexyip nnijawi ti  
 pøky'ajtp, ku ja jeexyip tkanigajpxy  
 kudam ja pyøkyi ku ja nmigu'uk  
 pyikta'aky njanchpøkwa'anxant.

<sup>8</sup>Ja'agøjxpts ja pøky tø myøjtøki  
 jøts ja myøj'aty. Pøni sa ja kutujk  
 yja'ane'emy jade'ents øts ja nnijawi  
 midi'ibi ka'øy, jøts øts ja jinaxy  
 nduñ sam øts y'ijty nga'adi'ich ku  
 øts ja kutujk nganjawinim. Ku  
 ja kutujk kya'ity, ka'ats ø nnijawi  
 midi pøky. <sup>9</sup>Tø øts jade'en njaty  
 ku ja kutujk ka' nnijawinim, tøøp  
 ø njawi n'adi'ich, ka' njawi ja  
 pøky. Kuts ø tø nnijawi sa kutujk  
 y'ane'emy, jøts øts ja nbøky njawi  
 yjaaktyimyajadak'adi'ich, jøts øts  
 ja kawindem paadyim xuk'ijxy ja  
 øy'ajtin ja kunuu'kxin. <sup>10</sup>Wimbet  
 øts ja nduñ sa ja yja'ane'emy,  
 midi'ibik øts idø'øn xukpaatp  
 ja øy'ajtin, tø øts ja ne'egi  
 xyikpøkpyety. <sup>11</sup>Ja pøky ne'egi  
 nankmyøjtøjkiyip pøni sa ja kutujk  
 y'ane'emy jøts øts ja win'øø'nin tø  
 xmø'øy. Nay ja kutujk øts jadigojk  
 xanikajpxp ja o'jkin tigø'øyin.

<sup>12</sup>Ja kutujk, øy ja', jøts øy wa'ats  
 yikutuky nayide'en, øy'ajtingøjxp  
 tiy'ajtingøjxp yikutuky. <sup>13</sup>Jøts  
 pøni øy tam ja kutujk, ¿sudsots  
 øts ja xpayø'øy, jøts øts ja ñamyayi  
 xuk'ejxní ja o'jkin tigø'øyin?

Jøts øy ja kutujk, ja pøky øts jade'en xyik'ejtnip øøky tigøy, ka' ti jøp'ejxin, jøts øts ja jade'en xuknijawi jøts ku ja' pyøkyi; tamibøki midi øy, jøts øts ja kutujk jade'en xuknijawi jøts ku ja pøky ni sudso'ampy kya'øyi.

<sup>14</sup>Jøts nnija'windip adøm jøts ku ja kutujk Dios tja'aji. Jøts pojkipitumbijaa'y'ajtp øts, jade'en'ampy øts ja pøky xmimajada'aky. <sup>15</sup>Ka' øts nja'gyuki pø ti ø xjajtp, tum jiwimbejts ø nduñ, kuts ja njatunwa'añ midi øy, ja kya'øybi øts ne'egi xmimajadakp midi njagatunwampy. <sup>16</sup>Kuts øts ja nduñ ja ka'øybi midi njagawampy, jade'engøjxp nnijawi ku ja kutujk y'øyi, ja'abi kutujk ka'axi tyikutuky jøts ja'abi ndu'unint. <sup>17</sup>Kidi øtsip ja kø'øm ñamyayi jade'en ndyimyjatumpy, ja pøky jade'en adøtsp midi ø nnikøjxp'ajtpy.

<sup>18</sup>Nnija'wip øts sa jaa'y'ajtin yikjagyepy, niwine'en ja ka'øy'ajtin kyayikmøødi; njatsøky'ajtpy øts jøts ja øybi ndu'unt, ni ka'apts øts ja nduñ. <sup>19</sup>Ka' øts ja øybi tsujpi nduñ midi njatsøjkpy, tum ja ka'øybi ø ndun'adichpy midi njagatunwampy. <sup>20</sup>Kuts øts idø'øn ja nduñ jade'en midi ø ngatsøjkpy, ka'ap øts ja kø'øm ndsøkyøjxp nduñ, pø ja pøkxyi øts ja jade'en xuktump midi ø nnikøjxp'ajtpy.

<sup>21</sup>Jade'en njaty ngubety, ku øts ja njatunwa'añ midi øy midi tsuj jøts tum ja ka'øybi ø ndumpy. <sup>22</sup>Wamp øts n'am njotp jøts ku øts ndsojki ja Dios kyutujk; <sup>23</sup>kuts ø kø'øm nnay'ijxyi, jøts ø njawi jøts ku ja jaa'y'ajtin ka'ap jade'en tsøky sam ø njawinmay, ja pøkyts idø'øn

xuktump midi ø nnikøjxp'ajtpy, jøts ja' ø xkamajstutp jøts ja øybi ndu'unt.

<sup>24-25</sup>Ja Dios øts ndagødøjkip ja nwinmaa'yin jøts øts nbaduujnit ja kyutujk, jøts øts ja njaa'y'ajtin ja' ja y'adsinaapy ja pøkyu'unin, ja' ja mimajadaajkip. iTi ø njanch'ayøøy! ÷Pøn øts ja pøky xuknitso'ok'atp midi øts jam nikøjxp'ajtpy, midi øts xyik'ookwamp xyiktigøøwyamp? Kuuyi Dios amuum, nwindson'ajtim Jesucristo køjxp yikpaaty ja nitso'ok'ajtin ja'ayi. iJanch møj ja Dios!

#### Ja jujky'ajtin midi Dios xmøø'yimp

**8** Pøn tmøøt'ejttip ja Jesucristo ka'ap Dios Teety ja mibaat tyaguwaniyidit jøts ja y'ayo'odit, kumi ka'ap ja t'ukyikmøj t'ukyikmøjtøjkiñidi ja pøky. <sup>2</sup>Ja Espiritu Santo midi tyajkp ja jujky'ajtin xemikøjxp ku nmøøt'ejtint ja nwindson'ajtim Jesucristo, ja' øts ja pøky tø xukniwa'ach midi øts øøky tigøy tø y'ity xyik'ejtnip. <sup>3</sup>Jade'en'ampy ja kutujk y'ijty kyamajada'aky ku adøm n'ambojkipitu'uñim nadsaachpøjkpitu'uñim. Tøts ja Dios Teety tkexy ja y'U'nk, jøts ja nayide'en tnanky'ijxyi sam ja jaa'yin, jøts ja tku'o'jki ja pøky. Xjats ja tø tmimajada'aky jade'en'ampy ja pøky, jøts adøm ja ka'ap x'ukmimajadaajkna'am. <sup>4</sup>Ja'agøjxp ja jade'en tø ttuñ jøts adøm ja kyutujk ja wa'ats nbaduujna'am, pø ja'ayixi adøm ja Espiritu Santo yja' nbawinmaajyam, jøts kidi kø'øm winmaa'ñip adøm nyikmajadaajkyim.

<sup>5</sup>Pøn kaniwaaajtsipnim ja pøky, ja' yjotmay'ajttip sa kø'øm wyinmaydi; pønts tpaduujnidip ja Espíritu Santo yja', nay Diosts chøky'ajtin ja ja'ayi pyaduujnidip. <sup>6</sup>Jøts ku jade'en njotmay'ajtin sa kø'øm nwinmaa'yin, yø yjade'embí dø'on yikwindigøøpy; kuts njotmay'ajtin ja Dios yja', ja'ats xukpaajtimp ja juky'ajtin xemikøjxp, jøts ja øy'ajtin midí Dios yajkpy. <sup>7</sup>Pøn ja kø'øm winmaa'n tyiktundip sa kø'øm wyinmaydi, ja Dios ja jade'en myidsepøjktip kumi ka'ap Dios kyutujk ja ttsojkidi, jøts nika'ats tjajtmidi sa tpadu'undit. <sup>8</sup>Paty idø'on pøn ja'ayi ttundip ja kyø'ømwinmaa'n midí pøkmyøøt, ka'ap Dios ja mibaat jade'en twindsø'øgidit.

<sup>9</sup>Jøts meets, kumi ka'ap meets x'ukyiktuni ja mgø'ømwinmaa'n, ja Diosts meets ja y'Espíritu Santo mjagyajpíp, ja' mee myikjuky'ajtniyidi, pø ixamxi ja xnikøjxp'ajtnidi. Pønts tkayiktuujnip ja Espíritu Santo, ka'ap Cristo ja yja'atyí nayide'en. <sup>10</sup>Pøni mmøøt'ejtidipts meets ja Cristo, øøky windigøyts ja pøky ñamyayi ñøjkxni møøt ja mnine'kxti, jøts ja anmija'win ne'egi yjuky'aty ja'agøjxp ku ja Dios tø mgupikyidi. <sup>11</sup>Pøni mjanchmøøt'ajtidípts ja Dios Espíritu Santo, midí ja nwindson'ajtim Jesucristo ojs jadigojk xemikøjxp yikjukpyikyí, nay ja Diosts meets ja mnine'kx kø'øm yikjukpyøkip, jøts jadigojk xemikøjxp mjuky'attit.

<sup>12</sup>Jøts xpaat'ajtindip adøm, migu'uktøjk, jøts ka'ap

njuky'ajtindit pøky agujkpy midí ttuktump ja kø'øm winmaa'n.

<sup>13</sup>Pøni mdunwandípts jade'en sa ja pøktyu'unin, øøky mee m'ejtni, kudigøy mee m'ejtni; pøni m'ajot'ajttípts ja Dios Espíritu Santo jøts ja xukmimajada'akti ja mbøky, mjuky'atpts meets jade'en xemikøjxp.

<sup>14</sup>Ja' ja Dios Teety y'u'nk'ajtpy pøn ja Espíritu Santo ja tyukpudøjkíp jøts ja wyinmaa'n ja tyiktøøji tyiktudaajki. <sup>15</sup>Ku myikmo'odi ja Espíritu Santo, kidi ja'ajip ja myiktanimøø'yidip jøts meets tsø'øgi jawi myik'etidit, pø ja Espíritu Santoxi meets ja Dios mmøøjyidip jøts m'u'nk'atidit ja Dios, jøts ja' idø'on xyikwa'anindip amguk jotkukj ku adøm ja ndeety'ajtyim. <sup>16</sup>Ja'abi Espíritu Santo majada'akp, jøts adøm ja tu'uk amumjoojt xukjanchja'want jøts ku adøm ja Dios x'u'nk'ajtyindi. <sup>17</sup>Ja' adøm xja'ajtindip, paty adøm nayide'en ja Dios xmøø'yindit ja juky'ajtin midí ja tø twanda'aky, midí ja xmøøpwy'a'anindip. Midí ja Cristo yikmøøpy, nay ja'ats adøm yikmøø'yindip. Pøni ngupøjyindip adøm ja ayo'on sa ja tø y'ayøy, winets adøm ja nay ja'abi øy'ajtin xukpaajtant midí ja yikmøøy.

<sup>18</sup>Kidi nayide'enip ja' sa adøm ixyam ja ayo'on nbaajtyindi, ka'ap ja jade'en tmi'abaaty midí dø'on Dios kyunuu'kxin'ajtpy, midí dø'on jaanim nbaajtindip n'ejxindip.

<sup>19</sup>Tuki'iyi midí ja Dios tø tyikøjy, yjanchja'awejxnip ja nayide'en juuninim yja'att ja et ja xøøw ku ja Dios tyiknigaxø'økt pøn jaty ja y'u'ngíp, pøn jaty ja yja'ajtpy.

20 Nayide'en amuum ja naxwii'ñit tø y'ayo'ombaaty Adán pyøkyøjxp, kidi kyø'ømdsojkingøjxpiip ja naxwii'ñit ja jade'en yjaty, ja Dios ja jade'en tø tyanibiktaagiyi; yikmøøpyts ja jøp'ijxy'ajtin jøts ja øy juuni ja øy'ajtin jadigojk tpaatt, 21 jøts ja Dios ja yiktigajtsmiyit amuum, nay ja'abi øy'ajtin tpaatt midi ja jaa'y yikmo'odip pøn jaty ja Dios u'nk'ajtidip, jøts ja ñiwa'adsit nayide'en ku ja tø pyøkpety, ku ja tø wyindigøy. 22 Jade'en ixyam yjaty ja naxwii'ñit midi ja Dios tø tyik'øyi, sam tu'uk ja tø'øxyøjk y'amnipiky chaachnipiky ja y'u'nk ku kye'exy, amuum tmigii'pxy tmibø'oty. 23 Jøts kidi ja naxwii'ñip jade'en ja'ayi tyimyajtp, nayide'en adøm njajtma'an ku adøm tø ayo'on nbaajtyim, øy adøm ja Dios ja y'Espíritu Santo tø xmø'øyim ejxpajt'ajtin, ja'agøjxp ku xjaaktukpaatwa'añimnimdi midi paat'ajtiyidip pøn jaty ja Dios u'nk'ajtidip. Njantyimyjøp'ijxy'ajtyindip adøm, jøts ku øy juuni yja'att ja xøøw ku adøm ja Dios amuum xja'ajtindit ejxim tu'uk ja u'nkteedyin, jøts ja xyiktigajtsa'ant ja nne'kx. 24 Janchja'wingøjxp ja'abi nitsoojkin yikpaaty; kuts ja janchja'win yikmøøt'aty, ja' idø'on tyijpy ku adøm n'awijxyindinim midi ngapaajtyindipnim. Jaa ku ja jeexyip yikmøøt'ajtni, çtits idø'on jaakyik'awexp? 25 Kuts adøm idø'on jade'en njøp'ijxyindi midi kayikmøø'yindipnim, yiktudakpy ja tsinaa'yin jøts ja winmaa'ñ ja'. 26 Jøts nay ja Dios Espíritu Santo adøm xpudøjkamp ma

nayja'wiyam nduu'dujkyim, ku niti winmaa'ñ, niti aaw, niti ayuujk ngajagejpyindi, jøts ka' ja winmaa'ñ nbaajtyindi sudso nmøøtmadyaajkint ja Diosu'nk. Nay Espiritu Santots kø'øm ja Dios Teety t'amidoop ja pudøjkin sa nduu'baajtint nduu'ejxint, ja'agøjxp ku tjaty sudso øy ja Dios Teety tminuu'kxa'akt. 27 Jøts wa'ats ja Dios Teety xnija'wa'am sa jaty pønjabøn wyinmay, jøts ja ñimadøyi Espiritu Santo sa jaty ja wya'añ ku ja xku'amido'owam sam ja Dios Teety kø'øm ttamidsøky pøn jaty ja yja'ajtpy.

#### Cristo køjxp nmajadaajkyindi

28 Nnija'windipts ku ndsojkindit ja Dios, yajkpts ja pudøjkin ja' pøni ma jaty sagasa njajtyindi, jøts jade'en tyik'øpyidsimy pøn jaty ja tø twi'ixy, sa ja jawyeen tø ttanibiktaagi kø'øm. 29 Tø ja Dios Teety twi'ixy patki'jyi ja yjaa'y jøts ja tø twiwich. Tøøyip ttanibiktaagi jøts yjaa'y'attit nayide'en sa ja Dios U'nk yjaa'y'aty, pøn tnigubajk'ajtp ja jaa'y pøn jaty ja Dios Teety ja'ajtidip, tum uch tum migu'uk ja tjawi niduki'iyi. 30 Pøn ja Dios tø ttanibiktaagi jade'en patki'jyi, jøts ja tø twaadsøy; kuts ja tø ñimiñiyi, jøts ja tø tkupiky, winets ja nayide'en tø ttamini'adsøwi ja øy'ajtin amuum.

31 ¿Sats adøm ja nwa'anin ndejint? Pø amuumxi adøm ja Dios møøt n'ijtyindi, çpønts adøm xnimyimajadaajkimp jade'en? 32 Ka'ap ja Dios t'ama'at'ajty ja y'U'nk, kyøyajk ja' jøts ja y'lookt adøm nbøkyøjxp; çsudso dø'on

ja ndejint adom xkamøøgyøjxint tuki'iyi midì myøøt'ajtpy, pøni tødam ja kyø'om U'nk jawyeen tø xaniguejxyim? ¿Tiku dø'øn ja ndejint tkayakt? <sup>33</sup>Øy pøn tjanì'øøniwya'añ ja jaa'y pøn ja Dios tø wyi'ijxyidi, pø Diosxi ja kø'om tø kyupikyidi, <sup>34</sup>¿pønts ja mibaat nidyanigutujk'atidip jøts ja tpaattit ja ayo'on? Pø ja Cristoxi ja tø kyu'oogiyidi, jøts nay ja'ats tø yjukpyiky xemikøjxp, Dios Teetyts ja amuum møøt y'ity, jøts ja' adom jam xni'amido'owamp pøni sà ndyimyajatyindi ndyimgyubejtyindi. <sup>35</sup>Ku xpa'ayø'øyim ja Cristo, ¿pøn adom ja xni dyukmajtstuujtimp ja pya'ayo'owin? Nipøn adom ja xkadukmajtstuujtint, wan tjati'ayo'oni, øy njajotmay'ø'jkyim, øy njayikjemdu'uñindi njayiktedu'uñindi, wan yuu tja'ity, uk ku wet naamy xka'ejtkindi, uk ku tsep, uk o'jkin tigø'øyin yjayikpaaty. <sup>36</sup>Pø yide'enxi jap nøkyijxpy wya'añ:

Ejtp øøts ja jaa'y xyik'ookwa'añ ja'agøjxp ku øø nbaduujni ja mja';  
jade'en øøts nyiktuñ sà jiyujk sà borreek y'ookwa'añ.

<sup>37</sup>Øy adom jade'en njajatyindi, ne'egits adom ja jinaxy ndyimyimajadaajkyindi ja' myøk'ajtingøjxp pøn ja pya'ayo'owin tø xmø'øyindi.

<sup>38</sup>Jade'ents ø nwa'añ jøts ku niti nipøn xkadukmajtstuujtint mibaat ja Dios pya'ayo'owin, nja'ø'jkyindi njadigø'øyindi, uk njadyimyajajuky'ajtyindi. Ni ja ankilis ja xkadukmajtstuujtindit uk yjayikutujkpitøjkidi,

yjadyimyajaja'ajidi pøn jap tsajpjøtpy uk yjamajidi. Ni ja xøow ni ja jumøjt midì ixyam yø'øpy, uk midì memp kidakpnim, nija' adom ja xkadukmajtstuujtindit. <sup>39</sup>Wan ti tkøjxpi, uk wan ti tkøjki, wine'en Dios tø tyikøjy niti kyamayi yjade'embi jøts adom nmajtstuujtindit ja Dios pya'ayo'owin, midì ja tø tyiknigaxi'iky nwindsøn'ajtim Jesucristo køjxp.

### Dios ja Israelit jaa'y tø wyi'ijxyidi

**9** Tiy janch ø ngajpxy, pø ja Cristoxi øts njanchja'wip, ka'ap ø ndaabyaaty; ja Dios øts y'Espiritu Santo wa'ats xuknija'wip jøts ku øts tiy'ajtingøjxp ngajpxy. <sup>2</sup>Janch jotmay'oo'kp øts, ndyimchaachkyuwinnma'ayip øts kajaa, <sup>3</sup>jøts wamp øts, øy meets ayo'on patki'py ndyimgyu'ettit jøts ja Cristo ngamøøt'etnit pøni tsojkip jade'en, nugo ku øts nmigu'uktøjk n'ødyuñ jøts xpaattit ja Dios, wine'en ndukojpk'ajtyindi. <sup>4</sup>Ja Israelxi ja tyeety'apidip, jøts ja' Dios tø y'a'ejxyidi jøts yjagyepyidi. Jøts ojts ja kø'om ja Dios kyunuu'kxin t'ejxyidi tnija'wiyidi, jøts ja' ja møøjyidøø ja tiy'ajtin sudso ja jadigojk ñitaniyidit ja Dios. Jøts nay ja' ja ttagøðøjkiyidøø ja Moisés kyutujk, jøts ja windsø'jkin midì ja tyu'undip jam ma ja chaptøjkti. Jøts nay ja' ja Dios ttukmidajjnidoø ja wyanda'aky jøts ku ja y'ødyunidit. <sup>5</sup>Tu'ugyi aats kugoj ja'adi pøn jaty israelit jaa'dy; jøts nay ja' ja tyeety'apidip pøn adom ndeety'ap'ajtyindip, nayide'ents ja Cristo, pø adomxi



ja' ñamyayi njaa'y, jøts køjy ja'ani ku ja amuum tñitanit ti jaty ejtp ñaxwiiñ, pø Diosxi ja', windsø'øgi winjawi ja y'ity xemikøjxp. Jade'en idø'on ja y'ejxi. <sup>6-7</sup>Kidits nwa'añim jøts ku ja Dios tkayik'adukñim ja wyanda'aky midi ja møjaa'y Israel yiktaniwandaajkøø wine'en y'ap y'ok ja tø ñajtska'axidi. Ka'ap ja Dios ja'ayi tø twi'ixy ja'ayi pøn ja Abraham y'apteety'ajtip; pø yide'enxi Dios ja wyinaty tø ñii'mxyi: "Nayi mets mnigojpk'ajtpy ja Isaac y'u'nk y'unaj'kiti pøni wine'en ja ñajtska'axidi." <sup>8</sup>Jade'ents adøm nnija'wa'am jøts ku Dios ka'ap t'u'nk'aty pøni ma pøn jadu'uk jadu'uk kyugajpi, wan t'israelit jaa'yidi wan tka'israelit jaa'yidi. Ja' dø'on Dios y'u'nk'ajtpy pøn tjøp'ejxtip ja wyandaajkin. <sup>9</sup>Pø yide'enxi ja Abraham ja Dios ñimaajyøø ku ja Dios wyandaajky: "Tiempi køjxp ø nme'ent, u'nkpaatp yø mnidø'øxy Sara."

<sup>10</sup>Jøts kidi ja'ayipts nadyu'ugyi yiktamiwandaajki ku ja y'u'nk ja tpaatt. Jabi nayide'enxi ja Rebeca ja y'unaj'k tpaatmaa pøn ja Isaac tyeety'ajti, adøm ja ndeety'amøj. <sup>11-13</sup>Jøts ka'anim ja wyinaty yjaja'atinim, kidyimkya'axtipnim ja wyinaty, ka'anim ja wyinaty yiknijawi sa ja y'adø'øtstit øy ka'øy, jøts ja Rebeca ja Dios ojts ñii'mxyiyi: "Ja myøjpi tmidu'ump ja myutskpi." Nayide'ents ja møøt tuknax tijy ku wya'añ ja Dios kyajpxy: "Nwinja'wip øts ja Jacob, jøts Esaú ka'." Xjats ja Dios jade'en xuknija'wa'am jøts ku ja kø'øm twi'ixy kyø'ømsojkingøjxp pøni

pøn ja y'a'ejxip. Ka' tmøjpktaajkiyi ja y'ødyu'unin kya'ødyu'unin.

<sup>14</sup>¿Tits adøm ñikyajpximp? ¿Ti ja adøm nwa'anint jøts ku Dios ka' tyiy'adi'ich? iPø ka'axi! <sup>15</sup>Pø yide'enxi ja Moisés yiknimaay: "N'ayo'ejxp øts ja' pøni pøn ø kø'øm n'ayo'ejxwampy, pøni pøn ø kø'øm nba'ayoowampy." <sup>16</sup>Jade'en'ampyts ka' chøkyi jøts adøm ngø'ømwinmaa'ñ ndamajadaajkint, pø ja Diosxi kø'øm x'ayo'ejxindipnim. <sup>17</sup>Pø patyxi ja Dios kyajpxy wya'añ ku Dios tnøjmi ja jaa'y pøn windsøn'ajtp jam Egipto: "Ja'agøjxp møj windsøn tø nyikjaty jøts øts ja nmøk'ajtin nyikwingaxi'iky ku mets nmimajada'aky, jøts øts nxøøw o madsoo yiknijawit." <sup>18</sup>Xjats idø'on jade'en ja Dios t'ayo'ixy pøni pøn ja y'ayo'ejxwampy, jøts ja twinmaa'mbyiky pøni pøn ja kyayikmadogukiwyampy.

<sup>19</sup>Winets meets idø'on x'adsojimbett: "Pøni janch ku yjade'eni, ¿tigøjxp Dios tpøky'ixy ja jaa'y? Jøts ¿pønts mibaat t'ukwindso'op ja Dios?" <sup>20</sup>Jøts jaa'yts adøm, jøts ¿jaaktyimbyøn meets ku meets Dios yja' xkagupøjkit? ¿Ti ja ja tu'ljts tnimaañit ja ñijaa'y pøn ja tø yik'øyi: "¿Tiku øts jade'en tø xyik'øyi?" <sup>21</sup>Pø ja tu'ljtsna'abixi kø'øm pajtip pøni sa ja kø'øm tyik'øyiwya'añ ja na'aknaajx; øy ja tyik'øyt ja tu'ljts tu'uk midi øy midi tsuj jøts ja tu'ugyi ttanibiktaaggi ti ja wya'ant, uk øyts ja nay ja'abi naajx tna'at jøts ja tyik'øyt jadu'uk ja tu'ljts midi øy ti ñiwy'a'ant.

<sup>22</sup>Ku ja Dios tmidani jøts tmiduda'aky'aty ja jaa'y pøn ja tø yikjotma'adyi, pøn tyimyjapaajtñiyidip jøts y'ayo'odit uk jøts ja tyimgyudigø'odyit, ti ja kamaa'nīyīp, ixe ja ayo'on ja ttuktagida'aky jøts ja myøk'ajtin ja jade'en tnanky'ejxit. <sup>23</sup>Ots ja Dios jade'en ttuuñ, ka'ats adøm ja jade'en tø xuu'nīm, ja'agøjxp ku adøm ja xpa'ayø'øyindi jøts tnanky'ijxyi jade'en mabaat ja tjagyepy ja myøk'ajtin, jøts ja t'ayo'ijxy pøn ja patki'jyīp tø twi'ixy jøts ja ttukpaatwa'añ ja y'øy'ajtin. <sup>24</sup>Tø ja Dios kø'øm xwi'ijxyindi, ku ja winaagin twi'ijxy ja israelit jaa'y, jøts nayide'en winaagin pøn ka'israelit jaa'dyi. <sup>25</sup>Sam ja Dios ja kyajpxy ttamigaxiyiñ ja kyugajpxy Oseas, ku ja wyaañ yide'en:

Pøn øts y'lity ngaja'ajtpy, ja' øts nja'bøkp,  
pøn øts y'lity ngatsojktip, ja'ats ø  
ndsoktip.

<sup>26</sup>Nay jam et ja xemijujkpyi Dios ja kø'øm yja'bøkidit ma ja yiknimaadyøø: "Meets, ka' mee nja'aty."

<sup>27</sup>Kuts ja israelit jaa'dyi, pø yide'enxi ja kugajpxy Isaías wyaañ: "Øy ja Israel mabaat ja y'u'nk y'una'jk yjamøjidi yjamayidi sam nøø'abu' myayin, niwinaagints ja'adi pøn nitso'ok'attip, <sup>28</sup>jabi ka'pxy ja Dios ja y'ayuujk tpadu'unt sa ja tø wya'añ, ku ja tyiknaxkida'akt adsu'jky ja tiidyu'unin ya naxwiñ." <sup>29</sup>Sam ja Isaías wyinaty jekyīp tø wya'añ:

Ku ja Dios jeexyīp tø  
tkayiknitso'ok'aty winaagin ja  
aats ja kugoj midī yikojpk'ajtp,

tø adøm jeexyīp jade'en  
njajtña'am sa Sodomit kajp  
sa Gomorrit kajp ku ja tø  
kyudigøøgyøjxti.

Sa israelit jaa'y tka'øyjawidi  
ja øgyajpxy ja ømyadya'aky

<sup>30</sup>¿Tits adøm ngajpxindip?

Yjanchja'win- gøjpxxi Dios ja tø kyupikyidi pøn ka'israelit jaa'dyi, yam ja y'lity tkajotmay'atti sa Dios ja kyupøkidit jøts ja ne'egi tø kyupikyidi. <sup>31</sup>Jøts ja israelit jaa'y, pøn ja kutujk tpadundip jøts ja jeexyīp ja' ja Dios tyagupikyidi, ka'ap ja ne'egi yikupøkti ja'agøjxp ku ja kutujk ka'pxy tkabadundi.

<sup>32</sup>Ka'ap ja twinmaydi jøts ku Dios ja tyagupøkidit ja janchja'win, ja' Dios ja tījy tagupøkidip ti jaty ja tyundip. Ja'ayi ja tyamøjti, ja'agøjxpts winguwopi jøpkuwopi tmijatti ku ja nwindson'ajtim tø myiñ. <sup>33</sup>Jade'en yjatti sam yiknigajpxy ma jap nøkyijxpy wya'añ yide'en:

Nyikaxø'økp øts jam Jerusalén  
tu'uk midī ja jaa'y nay'adsepi  
yjawīp jøts ka'ap ja pøn  
myayit;

pøni pøn ja tjanchja'wīp, ka'ap  
ja windigøy yjatt.

**10** Møk øts, migu'uktøjk, ja tsojkin njagyepy jøts øts ja Dios n'ajot'aty, jøts ø n'amidøy nbøktsøy jøts ja israelit jaa'y tñitso'ok'attit. <sup>2</sup>Jade'en ø nwa'añ jøts ku ja tjatsojkti ja Dios, jade'en'ampy ku ka'ap tjatti. <sup>3</sup>Ka' tñijawidi sudso Dios tkupiky jaa'y; kyø'ømgutujk ja' yiktundip, ja' ja tījy tagupøkidip ja Dios, ni tkamøjpikta'akti ja' midī Dios ja

tagupøkidip. <sup>4</sup>Pø ja'agøjpxpi ja Moisés kyutujk kya'uktuni, pø izaanixi ja Cristo jøts tum ja'ats ja Dios kyupijky pøn ja tjanchja'wip.

<sup>5</sup>Jøts ku Dios ja kutujk xagupøjkint, pø yide'enxi ja Moisés ja tjaay: “Pøni pøn tpadunwamp ja kutujk, ka'pxy tpadu'unt winets yikjujky'attit ma Dios.” <sup>6</sup>Jøts ku Dios xkupøjkin janchja'wingøjxp, yide'enxi ja wya'añ: “Kidi mwa'andi: ¿Pøndam nøjxpx tsajpøtpy? — jøts ja Cristo mye'ent—; <sup>7</sup>jøts ni mgawa'andit: ¿Pøn jap nøjxpx ma ja o'jkin?” —jøts yjujkyøkt ja Cristo xemikøjxp. <sup>8</sup>Pø ka'axi yjade'eni, pø yide'enxi ja wya'añ: “Ka'ap yjagami ja nitso'ok'ajtin, ixa ja xmøødidi wingon”, ku xjanchjawidit sa ja øgyajpxy ømyadya'aky mduknijawiyidi midi øø ngajpxwa'kxpy. <sup>9</sup>Ku mwa'andit jøts ku ja Jesús ja' nwindson'ajtin'ajtyindip, jøts xjanchjawidit amumjoojt jøts ku Dios Teety ja tø yikjujkyiky xemikøjxp jadigojk jap oo'kpi y'agujky, winets xpaattit ja nitso'ok'ajtin. <sup>10</sup>Ja' ja Dios xagupøjkimp ku ja amuum njanchja'want, jøts ku n'am njotpyidsø'omint ja ayuujk, jøts nwa'anint jøts ku ja Jesucristo ja' nwindson'ajtim'ajtyindip, ja' xyiknitso'ok'ajtindip. <sup>11</sup>Pø yide'enxi jap nøkyijxpy wya'añ: “Pøni pøn ja tjanchja'wip, ka'ap ja windigø yjatt.” <sup>12</sup>Tu'ugyi nwindson'ajtim ja tnitani, wan t'israelitjaa'yidi uk wan ja tka'israelitjaa'yidi; ka'ap ja pøn t'ejxma'aty, myøøpy kyejxpy ja kyunuu'kxin pøni

pøn ja t'ajot'ajtp, may'ampy ja tmø'øy. <sup>13</sup>Jabi yide'enxi wya'añ ja kyajpxy y'ayuujk: “Pøni pøn amumjoojt ja nitso'ok'ajtin t'amidoop nwindson'ajtingøjxp, ja'ats nitso'ok'attip.” <sup>14</sup>Kuts ja pøn tkajanchjawidinim, ¿sudots ja t'amidojidit ja kyunuu'kxin? ¿Sudso ja tniyanchjawidit ku ja jeexyip kyayiktumadowdinim pøni pøn ja', ku jeexyip kya'lity pøn ja nidyumadowidip ja øgyajpxy ja ømyadya'aky? <sup>15</sup>Pønts tkajpxwa'kxp ja øgyajpxy ja ømyadya'aky, ¿sudso ja jeexyip tniyajpxwa'kxti ja øgyajpxy ja ømyadya'aky ku Dios ja jeexyip kyakexyidi? Pø patyxi jap nøkyijxpy wya'añ: “iNdaxondaajkimp ja jaa'y pøn tkajpxwa'kxp ja Dios y'øgyajpxy y'ømyadya'aky midi xukmado'owimp ja øy'ajtin ja tuda'aky'ajtin!”

<sup>16</sup>Ka'afts jaa'y niduki'iyi tmøjpikta'akti ja øgyajpxy ja ømyadya'aky. Jade'en ja ttundi sa ja kugajpxy Isaías tniagajpxy ku ja wya'añ: “Dios Teety, ¿pøn ja m'øgyajpxy ja m'ømyadya'aky yjawi tø t'ukjanchjawi?” <sup>17</sup>Winet ja janchja'win yikjagyepy ku ja tø nmado'øyim jawyeen ja øgyajpxy ja ømyadya'aky midi ja Cristo nigajpxip.

<sup>18</sup>Ti kuts ø nyiktø'øt, jøts ø nwa'ant: ¿Wan ndejint tø xkamadowdi ja øgyajpxy ja ømyadya'aky? iPø tøxi xjamadowdi! Jabi ja'agøjpxpi jap nøkyijxpy yide'en wya'añ:

Tø ja øy madsoo yikmadowdi pøn ja tø tkajpxwa'kxti, tø ja øgyajpxy ja ømyadya'aky øy madsoo yja'aty ya naxwiin.

<sup>19</sup>Uk nwa'ants øts inet: ¿Wan Israelit kajp ndejint ti tkanijawidi? Jøts tøts ja Moisés ja Dios tyuknigajpxyi ku ja wya'añ:

Mdami'ama'at'atp meets ja wenk jaa'y ja nitso'ok'ajtin pøn kanayide'endi sa meets, pøn tkanija'widip, ja'agøjxp meets ja xami'ambøkt.

<sup>20</sup>Jøts ja Isaías ja Dios yjaaqtiymiyikwa'anımıyide'eni: Pøn øts y'ijty xka'ixaadyip, tøts øts ja ne'egi ixyam xpaatti; tø øts ne'egi nnanky'ijxyi pøn øts y'ijty xkanija'widip.

<sup>21</sup>Jøts ja Isaías ja Dios yjaakyikwa'añi ku ja tñigajpxy ja israelit jaa'y: “Tø øts kawine'en njawaadsøy ja jaa'dyi pøn kawindiy'oo'ktip, pøn niwine'enin kamadoodip.”

### Ja Israelit jaa'y pøn winaagin tpaattip ja nitso'ok'ajtin

**11** Jøts ø nyiktiidyøki: ¿Tø ja Dios tyimyjastu'uty ja Israelit kajp, ka'ap ja t'ukupøjki? iPø ka'axi! Israelit jaa'yxi øts køøm, tu'ugyi ja Abraham yik'aadsı yikojpki, ja Benjamın ø ndeety'apip. <sup>2</sup>Jekyıp ja Dios yø tja'biky yø israelit jaa'y; jøts ixymbaat tkamajst'u'uty. ¿Ti ka'ap meets ja Dios kyajpxy y'ayuyk xnija'wiyi, ku yiknimadya'aky ja Elías, pøn ja Dios kyugajpxyıp, ku ja ojts Dios t'ajot'aty jøts Dios ja ojts ttukmadøy sa Israelit jaa'y y'adø'øtsti? Ku ja wyaañ yide'en: <sup>3</sup>“Dios Teety, tø mgugajpxy yik'oo'kixyidi, tø yikjejtikixy ma jaty myikwindsø'øgi, nadyu'uk øts njaaktañ, jøts xyik'ookwandip

øts nayide'en.” <sup>4</sup>Jøts Dios ja ojts yide'en y'adsøy: “Tø øts abiky niwixujk mil ja jaa'y nwi'ejxti, pøn tkawinguxanaadyipniim ja awanax midi Baal yiktejp.”

<sup>5</sup>Nayide'ents idø'øn ixyam yjajtkojmi, ja winaagin pøn ja Dios tø wyi'ijxyidi, pøn ja kø'øm tø ttanibiktaagi y'ø'y'ajtingøjxp. <sup>6</sup>Ti tundaajk ja jaa'y øy ti pøn tjatuñ jøts tpaattit ja nitso'ok'ajtin, pø ja Diosxi tanibiktaajkip kø'øm jøts ja tyik'awa'añ ja myøk'ajtin y'ø'y'ajtin. Ku jeexyıp jade'en kø'øm ja' yiktamajada'aky, jade'ents ja jeexyıp tpaaty jøts ka'ap ja Dios y'ø'y'ajtin ti niwya'añ.

<sup>7</sup>Xjats ja israelit jaa'y jade'en winaagin tkapaatti sa y'ity yjawinmaydi, tømts ja tpaatti ja ø'y'ajtin pøn ja Dios kø'øm tø wyi'ijxyidi, jøts jaayi jadu'uk wimbeets kugoots tmijatti, ni tkaja'gyukiyidi ja Dios yja! <sup>8</sup>Jøts idø'øn ja jade'en yjaty sa jap nøkyijpxy wya'añ: “Dios ja kø'øm tuujnidip jøts ja kyadukjawiyidi sa y'adø'øtsti; ja win'ejxtip jøts ka' t'ejxpaatti, jamadoodip jøts ka' yja'gyukidi jøts jade'en ixymbaat yjatti.” <sup>9</sup>Jøts nayide'en ja David ja Dios yikwa'anmiyi:

Wan ja'ayi ttajotkøxti ja xødu'unin ja miga'ayin mi'uujkin, jøts nay ja'ayi tyapøkpyattip jadigojk jøts ja yiktagubattit.

<sup>10</sup>Wan t'etti wimbeets kugoots jøts kyaja'gyukidit, jøts ja xemikøjxp yiktagubattip.

### Sa nitso'ok'ajtin tpaatti pøn ka'israelit jaa'dyi

<sup>11</sup>¿Ku dø'øn ja israelit jaa'y jade'en ja Dios tø tyuñidi, tø ja

tyimwyindigøøgyøxti? iPø ka'axi! Øy idø'on ja tø kyamadowdi, tøts ja yjadu'ukpi tpaatti ja nitso'ok'ajtin pøn ka'israelit jaa'dyi, jøts ja tpa'ejxtit, jøts ja nayide'en ja janchja'win tjagyaptit sa pøn ka'israelit jaa'dyi. <sup>12</sup>Ku ja israelit jaa'y jawyeen kø'øm tø tkagupøkti ja Dios y'øy'ajtin ja'agøjxpts ja tø yikmo'odi pøn ka'israelit jaa'dyi, jøts ja jade'en'ampy pyaat'atyidi ja Dios yja'. Kuts ja israelit jaa'y jadigojk tmijotjimbejtkøxtit ja Dios, ¿ja ti ka'ats ja naxwii'ñit jaa'y ja kunuu'kxin nayide'en jawaani møj tpaattit?

<sup>13</sup>Nyiknaxwampy øts nayide'en aaw ayuujk, jøts ø ndukmadoowa'andi meetsti pøn ka'israelit jaa'dyi. Pø meetsxi tø nyiktaniguexy ku øts ja Dios tø xkexy, jøts xnijawidit jøts ku øts ja ngajpxwa'kxin ka' ñiñugoji. <sup>14</sup>Kidi wanik jade'en winaagin ñitso'ok'atti ja nmi'israelit jaa'dyi ku mba'ejxidit nayide'en sa mee xpaaty ja nitso'ok'ajtin. <sup>15</sup>Jabi jade'enxi ja naxwii'ñit jaa'y tø tpaatti ja nøø' ja tuu' sudso ja Dios myaa'kxujkin tpaajtidit, ku ja Dios tø t'ats'ejxma'aty ja israelit jaa'y. ¿Tits idø'on tyimyikpatp ku ja israelit jaa'y ja Dios jadigojk t'awimbetidit? Ja nitsoojkin idø'on ja jadigojk pyatp pøn windiy'ejtnidip. <sup>16</sup>Ku ti t'ukja'biky ja Dios, amuumts ja tja'ajtkixy. Pøni myi'ijtpy ja ujts'aats ja ujtskojpk ja', nayide'ents inet ja tmi'ett amuum tuki'iyi møøt y'awaj y'axeñ.

<sup>17</sup>Jade'ents idø'on ngajpxin ja israelit jaa'dyi sa ja kipy awaj midi ja olivo kipy y'awaj'ajtpy, jøts meets

jade'en pøn ka'israelit jaa'dyi sa jadu'uk pa'olivo kipy y'awaj midi ñiñugo øy ma ujtsjøøjty ejtp. Kuts ja yikajtspøøty midi ja israelit jaa'y kipy'ajttip ndejint, jøts meets ja mja' ne'egi jam yikøx'øøch ma dø'on jam ja jadu'ukpi awaj tø wyinaky. Jøts meets ja jade'en xpaat'aty ja jujky'ajtin midi xemikøjxp, tu'ugyi ja m'aats mgojpk ñamyayi y'etti. <sup>18</sup>Ka'ats mnadyamikaxidit, kidi xuktamøjidi xuktamutskidi ja israelit jaa'y pøn ñamyayi ixwejtsidip ja Dios. Pøni m'adø'øtswandip jade'en, jawidi jøts ku nayi israelit jaa'y ñikøjxp idø'on ja nitso'ok'ajtin tø mnimiñidi, kidi mgø'ømnikøjxpiti.

<sup>19</sup>Mjawa'añ meets: "Janch jade'enimts, tøts ja yjiwa'akti jøts øøts ja ixyam ngudanaañip."

<sup>20</sup>Jade'en'ampyts ja yik'ixwetsti ku tkajanchjawidi ja Dios, jøts meets myikupiky jade'engøjxp ku ja xjanchjawidi. Kidits mnamyikexyidi, øyim yikxonim tuda'aky mnabyikta'agit. <sup>21</sup>Pø m'ejxtipxi mnija'widipxi ku Dios ja israelit jaa'y ja tkadamee'kxy, jøts nayide'ents meets ja mgadamaa'kxmiiyt ku jade'en m'adø'øtstit. <sup>22</sup>Jøts m'ejxtip mnija'widip jøts ku Dios janch øy, jøts tum ja tiy'ajtin yiktumpy. Møk ja ttiidyuñ pøn ja midundigøjyip. Mmi'øy'ajtipts meets ja', jøts tu'ugyi xpayø'øyidit ja y'øy'ajtin; pøni ka'ap jade'en xpadundi, nayide'ents nøjcx mjatti sa ja israelit jaa'dyi. <sup>23</sup>Kuts ja israelit jaa'y jadigojk tmijotjimbettit ja Dios jøts tjanchjawidit amumjoojt, kupøkidip ja jadigojk jøts ja jujky'ajtin

myo'ojidit midí xemikøjxp; tyu'ump ja Dios jade'en, ti ja ka'ukmajyip.

<sup>24</sup>Sa meets ja tø mgupikiyi, jøts ka'ats meets mja'israelitjaa'yí, jøts tøts meets ja mmø'øyi ja nitsø'ok'ajtin, iti kuts ja israelit jaa'y kyayikupøktit, pø ja'axi ja y'ity tyimyjapaat'ajtidip!

**Ku Israelit jaa'y nitsø'ok'attit xemikøjxp**

<sup>25</sup>Meets migu'uktøjkti, ndukmadoowandip icyam jøts xnijawidit sa Dios ja wyinmaa'n̄ tmøø'taty, jøts ka' nugo mnay'agajpxidit jøts ku meets wijy'ajtin amuum xmøø't'ajtkixy: tø Israelit jaa'y ñamyayi y'amutski. Ejtpn̄im ja jade'en kunim ja yikupøktit namay pøn ka'Israelit jaa'dyi. <sup>26</sup>Ku nøjkk jade'en tø y'ukjaty, winetn̄imts ja Israelit jaa'y ni'lijtyi nitsø'ok'attit, pø patyxi jap nøkyjxpy yide'en wya'añ:

Kaxø'økp tu'uk ja Israelit jaa'y, ja yiknitsokpi, jøts ja' ttukniwa'ats'atp ja jaa'y ja ka'øybi pøn jaty ja Jacob t'aadsidip tkojpkidip.

<sup>27</sup>Jøts ngajpxy n'ayuujk øts wyinaty jade'en nyik'adujkpy, ku øts ja nyikpøkwyat'atstít.

<sup>28</sup>Pøn israelit jaa'dyi, pøn tkagupøjktip ja øgyajpxy ja ømyadya'aky sudso ja nitsø'ok'ajtin yikpaaty, ejxma'jtñiyidip ja Dios ja ñamyayi jøts meets ja mgunuu'kxy; ka'apts ja Dios ja tyim'yixmachidi, tsojkidip ja' ja'agøjxp ku ja Dios kø'øm tø twi'ixy ja møjaa'dyøjk. <sup>29</sup>Pø ka'axi Dios ja jadigojk tpiky pøni ti ja yajkpy; pøni tø ja twi'ixy ja jaa'y, ¿sudso ja nugoyi t'ixmatst

jadigojk? <sup>30</sup>Meetsxi ja Dios y'lijty mga'ukmimadøpy, kuts ja israelit jaa'y ja tø tkamimadowdi, xjats meets ja Dios tø m'ayo'ijxyi. <sup>31</sup>Jøts ja nayide'en yjatti sa meets y'lijty xkamimadøyin ja Dios, ja'agøjxp ja jade'en ttuñ jøts ja jadigojk t'ayo'ext nayide'en sa mee tø myik'ayo'ijxyin.

<sup>32</sup>Ja Dios jade'en kø'øm tø ttanibiktaagi jøts ja niduknax kyayikmimado'ot, ja'agøjxp ja jade'en ttuñ jøts o pøngapøn tuknax ja ttuk'ext ja pya'ayo'ajtin.

<sup>33</sup>iKa'ap jade'en ti tmi'abaaty sa ja Dios ja øy'ajtin tjagyepy, sa ja wijy'ajtin, sa ja ja'gyukin tmøødi! Ka'ap pøn tmiwinmaa'nbyaaty pøni sa wyinmay, pøni midí tyunwampy, ma ñøjkkwa'añ yja'atwa'añ. <sup>34</sup>“¿Pøn tniñja'wip sa ja Dios wyinmaa'n̄? ¿Uk pøn ja tyukjaty jøts ja jade'en ttu'unt? <sup>35</sup>¿Uk pøn ja Dios jawyeen ti tø tmø'øy, jøts ja ja' ttaguyaki midí ja xmø'øyimp?” <sup>36</sup>Tum ja Dios amuum tja'ajtkøjxp jøts ja' tyik'øygyøjxp, jøts ja tyiktunwa'añ pøni ti jaty ja tø tyik'øyi. iKunuu'kxy etpyim ja Dios xemikøjxp! Jade'en idø'øn y'ejxi tyiyi.

**Midi chøjkpy ja Dios ku ja nnadyagøðøjkant**

**12** Kø'øm mee migu'uktøjk ja Dios amuum mnadyamiyoxit. Øy'ajtp jøts jade'en xu'undit midí ja y'øyja'wip kyunuu'kxyja'wip, ja' ñamyayi mdawindsø'ogidip ja Dios. Ku ja x'ayo'ijxyindi, jade'en mee nminuu'kxa'aky jøts jade'en xu'undit. <sup>2</sup>Kidi jade'en mdsinay'adø'øtsti sa xuktu'uñin ja

kø'ømgutujk, ja kø'ømwinmaa'n. Mijotjimbetti ja Dios jøts ja mwinmaa'n nayide'en tyigatstit, winets ja jukya'ajtin xpaattit midu amuum myiktigatsidip jøts jade'en xnijawidit midu ja Dios chøjkpy, ja øybi ja tsujpi midu ja Dios mda'øyja'wiyidip, midu øy wa'ats pidsømp.

<sup>3</sup>Yide'en øts ja Dios xanigutujk'aty y'øya'ajtingøjxp, jøts ja' mee ndukmadøøpy, kidi nugo mnadyamøjpikta'agyidi pøni ti jam jadu'uk jadu'uk yjajtpy. Pøni mabaat ja Dios kø'øm tø mdukjatyidi, ja' mja'gyukidip. <sup>4</sup>Ka' ndukna'ajtyindi, nayide'en sam ja nine'kx yikjagyepy may jøøjp yikmøødi, jøts ka' tum ja' wya'añ pøni ti tu'uk wya'añ, <sup>5</sup>nayide'ents adøm idø'ønmidu, øy adøm mabaat njamaya'am, tu'ugyits adøm ja Cristo xja'ajtyindi, jøts nixem niyam ni'amuki n'ijtyindi sa kø' teky tkamajststu'tuty ja nine'kx.

<sup>6</sup>Kija' ja Dios xyikwinmaa'nbyaajtyindi pøni sa ja kø'øm ttamidsøky nidu'uk jaty. Wants tyiktunkpaajtyindi øy yikxon. Pøni tø Dios xmø'øyim ja wejin kajin jøts ngajpxnajxa'ant ja y'ayuujk midu ja tø xmø'øyim, ndu'unindipts ja jade'en pøni mabaat ja janchja'win xukjagyejpyindi; <sup>7</sup>jøts pøni tøts ja xmø'øyim ja wejin kajin jøts ja nmigu'uk nduujna'ant ja y'øybi, mbadu'unindipts idø'øn ja jade'en. Jøts pøni pøn ja Dios tø myø'øyi jøts yik'ixpøkt, ja'ats idø'øn ja tyu'ump; <sup>8</sup>jøts pøni jamts pøn tø yikmø'øy jøts tkajpxjot'amøjkit ja myigu'uk, ja'ats idø'øn ja

tyu'ump. Pøni jamts pøn øy ti tyajkwa'añ, ka'ap kyø'ømwinmaa'n tyikyø'øty jøts ja ja' ttaguyakit øy ti. Pøni jamts pøn yikmøøpy jøts ja tnoø'mo'ot ttuu'mo'ot ja myigu'uk, yikxonimts t'ext tuda'aky'ampy; jøts pøni pøn tpudøjkidip ja ayooði jaa'y pøn ti ka'ejtxidip, ejtni xoni dø'øn tpudøkidit.

**Sa pyaat'aty ti ttu'undit pøn ja Cristo yjanchja'widip**

<sup>9</sup>Nabya'ayowidi nixem niyam. Yikjiwa'akti ja ka'øybi, jøts tundi ja' midu øy midu tsuj, midu ja Dios kyupiky'ajtpy. <sup>10</sup>Yik'awa'andi ja amigu'uk'ajtin jøts nixem niyam mnamyayidit wine'en Dios mja'atyidi, nawyindsø'øgyidi nixem niyam, kidi pøn xkamø'ejxiti.

<sup>11</sup>Jotmay'atti ja Dios, kidi mnuuxidi, amumjoojt xmidu'undit ja Dios.

<sup>12</sup>Taxonda'akti jøts ku ja myikmo'odit midu mjøp'ejxtip; jøts kidi nugo x'ayojidi wine'en mjemjatti mdejatti, jøts kidi x'ixmatsti ja Dios'ajot'ajtin nijuuni.

<sup>13</sup>Pøni jam ti kya'ijtyxidi pøn ja Dios yjanchja'widip, pudøkidits; øyim yikxon xyikja'attit xyiktsoondit pøni pøn mbaajtidip m'ejxidip mjønjojp mdøjkjojp.

<sup>14</sup>Pøni pøn mga'ødyuujnidip, tagødøkidi ja Dios. Jøts amidowdi wan tyikunuu'kxti jøts kidi meets ja jawyeen xka'ødyijy.

<sup>15</sup>Xonda'akti nayide'en pøni xonda'aktip ja mmigu'uk, tsaachjawidits nayide'en pøni jiidyp yaxtip.

<sup>16</sup>Namyayidi nixem niyam, yikxon mdsøonidit mdanidit. Kidi

mnamyikexyidi, møøt'etti pøn ayooobi jaa'y'ajttip. Kidi mwa'andi jøts ku meets nadyu'uk tuki'iyi xjaty.

<sup>17</sup>Pøni tø pøn mga'odyuñidi, kidits meets ja nayide'en xunwimbejtmidi. Ejtp xu'undit ja y'øybi øy madsoo. <sup>18</sup>Yik'amijatti mabaat mmajada'akti, jøts yikxon xmøøtsøønidit xmøøtanidit ja mmigu'uktøjk, amuum ja tudā'aky'ajtin xyiktu'undit.

<sup>19</sup>Kidi mee migu'uk kø'øm xagubety ja mmidsep pøni sa ja mduñidi, ja Diosxi kø'øm yik'ayo'ombaadiditnim; jabi yide'enxi jap nøkyijxpy wya'añ: “Øts xpaat'ajtp jøts øts ja ndiidyu'undit; øts ja ndagubattip, nømpxi Dios.” <sup>20</sup>Jøts nayide'en ja wya'añ, jøts ku tijy x'ødyu'undit pøn mmijotma'jtidip, wan ja tka'uknagyumayidi. <sup>21</sup>Kidi ja ka'øybi mmimajada'agyi, jaa ja xmimajada'akt ku tum ja øybi xu'unt.

**13** Mimadowdi ja windsøndøjk. Pø Diosxi kø'øm tø tyikutuky jøts ja kudunktøjk yja'attit. <sup>2</sup>Pøni pønts ja tkamimadoowampy, ja' idø'øn ja wyinaty kyamimadøøpy pøn ja tø tyikutuky jøts ku ja yja'attit. Pønts jade'en adø'øtswamp, pøky ja taja'adidip jøts ja nøjlx yiktiidyundi. <sup>3</sup>Jøts kidi ja'ajip ja kudunktøjk ñija'ajttip jøts ja t'adsø'øgidit pøn øyjaa'y'ajttip, pø ja'axi ja ñija'ajttip jøts ja tiidyu'undit pøn tundigøødyip. Pøni ka'ats tsø'øgi jawi mnachøkyi jøts jade'en xwingunøjkxit ja kudunktøjk, jaa'y'ats yikxon jøts ja

kudunktøjk niti mgadamatsit, <sup>4</sup>pø ja'axi Dios ja tø tyanibiktaagiyidi jøts ja øybi xu'unt. Kuts kø'øm mga'øyjaa'y'att, pøkyjawits mets ja mbøky; pø kidi nugojixpi ja kudunktøjk ja møk'ajtin tjagyapti ku ja tyiidyundi, pø ja'axi Dios ja tø tyanibiktaagiyidi ku ja tø tyikutuky, jøts ja ttiidyu'undit tiy'ajtingøjxp pøn tundigøødyip. <sup>5</sup>Ja'agøjxp pyaat'aty ximimado'odit ja kudunktøjk pø mwimmaadyixpi, kidi ja'agøjxpi ja nugo xundi jøts ja mgatiidyundi. <sup>6</sup>Nay ja'axi ja Dios tyikutujkp jøts ja kuguju'uyin xmo'odit ja kudunktøjk; pø nay ja Diosxi ja tø tyanibiktaagiyidi jøts ja jade'en ja tyajuky'ajtin tpaattit, jøts jade'en mjaaknigudunk'atidyidit.

<sup>7</sup>Migubajtkøxtits pøni pøn jaty jam mmijoy'ajttip. Pøni jam pøn kyayakñim kyagubetynim, wants ja tyakti; uk jamts pøn ti tkagujyynim tkagubetynim, wants ja tkugujuy tkugubety; pøni pøn jam ja windsø'jkin tyiktigøøpy, wan ja windsø'jkin tjagyepy; jøts pøni pøn jam ja amigu'uk'ajtin tyiktigøøpy, wan t'amigu'uk'aty ja myigu'uk. <sup>8</sup>Ka' ti pøn xamiyoy'attit, ja tsøjkin ja pa'ayo'owin ja' idø'øn tiy xem yam mjagyaptip; ku jade'en xu'undit, ja kutujkts meets idø'øn wyinaty jade'en tø xmimadøy. <sup>9</sup>Pø nømpxi ja Dios y'ana'amin: “Kidi mnidø'øxy kidi mniyaa'y mnabyøjkxiyidi, kidi myikjaa'y'øøky, kidi mmeech, kidi mdaay'aty, kidi xami'ama'at'aty ja mmigu'uk pyikta'aky”; jøts tuki'iyi ja Dios y'ana'amin tu'ugyi ja yide'en y'ayuujkpidsimy: “Mba'ayo'op ja mmigu'uk nayide'en



ejximdam kə'om mnabya'ayöyin.”

<sup>10</sup>Pøn ja tsojkin, pøn ja pa'ayo'owin tjagyajp, ka'ap ja tmidundigöy ja myigu'uk; jade'en'ampy ja Dios tkupik'atkixy ku ja tsojkin nyiktu'unint, jöts jade'en niwine'en ja kutujk kyayikmidundigöy.

<sup>11</sup>Jöts tə tyimbyaaty ja et ja xəow, tajotigöjyidi ja Dios yja'. Tyimwyingomp ja ayo'on winets xpaattit amuum ja nitso'ok'ajtin. Nax'adötsp ja et ja xəow, ka'ap y'ity jaakjade'en ku njanchja'wiy'okwa'añindi miduk'ojk ja Dios y'ögyajpxy ja y'ömyadya'aky. <sup>12</sup>Ka'pxnip ja et ja xəow, tyimdyukmibaat'ajtpy ja Dios; wants tmajstuuptyindi ja ka'odyu'unin ja pəktyu'unin, jöts jəp'ijxy nnanky'ejtna'andit, tum ja öybi wa'atspi nyiktu'unindip midi kapəkmyööt. <sup>13</sup>Wan tudā'aky tjaa'y'ajtna'andi sam pyaat'aty pøn tnija'widip ja Dios. Jöts kidi ja' ndunk'ajtyindi ja nəw ja mu'uk, uk ja pəjp ja tsa'pxp, nmiga'ayin nmi'uujkin, uk nnamyööt'atwa'añindi öy pøn mööt, uk ja tsep ja' njotmay'ajtyimp, uk ndami'ama'at'ajtyindip ja nmigu'uk öy ti. <sup>14</sup>Kidi jade'en m'adö'tsti, tu'ugyi nwindsön'ajtim Jesucristo xpadu'undit sa ja ya chinaay, jöts kyamöjtökidit ja mbəktyu'unindi.

#### Kidi mmigu'uk xpagajpxy

**14** Pöni jam pøn myajada'aky kyamajada'aky yjanchja'wingöjxp, kupəkitts, kidi sa xejtı, öy ja wyinmaa'n yjaganayide'endi sam meets ja mja'ajin. <sup>2</sup>Ja may pøn tjöø'kxtip öy nityi, jöts nayide'en pøn

amaay'ejttip, pøn nugo u'nkjii'kxy tsujxkjii'kxy ttojxtip, jöts wya'andi jöts ku ja' chökyi Dios wyingujkp.

<sup>3</sup>Pönts tjöø'kxp öy ti, ka'ap ja tka'öyjawit pøn amaay pøn wi'ijxy öy ti tjöø'kxp; jöts nayide'en ja'ami, ka'ap ja pyagajpxmit, ka'ap ja sa ttejmit pøn öy ti tjöø'kxp, pə təxi Dios ja kə'om kyupikyiyi, <sup>4</sup>jöts ja'ats midundip. ¿Mjaaktyimbyönts meets ku meets ja xpagajpxt, yamts ja Dios ja tmiduñ? Wan ja t'öyi uk tka'öyi, ja wyindsönts ja paajtip pöni sa ja kə'om tyuñi. Jöts yik'öyip ja', çti Dios ka'ukmajyip ku ja tka'ukyik'öyit myök'ajtingöjxp?

<sup>5</sup>Jöts jaa jadu'ukmidi pøn wandip tu'ugin ja xəow yik'amaay'att, jöts jadu'uk wyamidi ku ka' pyaat'aty ni midi xəow kyayik'amaay'att, tum jade'en ja xəow tu'ugyi. Kija'ats tnitanidit ja wyinmaa'n tigöjxp ku jade'en wyinmaydi. <sup>6</sup>Pøn t'amaay'ajtp tu'uk ja xəow, ja Diosts ja tyawindsö'jkkip; jöts pøn tka'amaay'ajtp, nay ja Diosts ja jade'en wyindsö'jkinmo'op. Jöts pøn tjöø'kxp öy ti, nay ja Diosts ja tyukmöja'wip tyukunuu'kxyja'wip; jöts pøn amaay'ajtmidip, ka' ti tniyji'kxy, nay ja Diosts ja tyawindsö'jkkip ku ja jade'en ttuñ, jöts ja ttukmöjawi ttukunuu'kxyjawi amuum.

<sup>7</sup>Ka'ap pøn nugo nıyjujky'aty, ka'ap pøn nugo nıy'ööky.

<sup>8</sup>Ku njujky'ajtyindi, Dios xyikjujky'ajtindip, jöts pöni ö'jkindipts, nay ja'ats xkwenti'ajtindip. Jöts jade'en yiknijawi jöts ku ja amuum xja'ajtyindi öy adöm njajujky'ajtyim, uk nja'ö'jkyim njadigö'öyım adöm.

<sup>9</sup>Pø ja'agøjpxxi ja Cristo yujukpyijky xemikøjxp ku ja tmimajadaajky ja o'jkin, jøts ja tu'ugyi ixyam tnitanaagyixy øy midil'ibi.

<sup>10</sup>¿Tigøjxpts ku mee kø'øm ja mmigu'uk xabayø'øy sa y'adø'tsti? Jøts ni xkatsokti paat meets ja'. ¿Pønts xijy ta'amp, pøn kanaxp jam Cristo wyingujkp? Pø ja'axi xabayø'øyindip ja nbøky, ja' xiidyu'unindip. <sup>11</sup>Pø yide'enxi jap nøkyijxpy wya'añ:

Øyi madsoo n'ity, jøts øts  
nwingujky niduki'iyi jaaly  
kuwani ñagyuxendyakøxidit.

Jøts wya'andit ku øts ja'ayi  
tu'ugyi ndios'aty.

<sup>12</sup>Jade'ents idø'on, kija' idø'on ngøyajkint jam Dios wyingujkp pøni sa nidu'uk jadu'uk tø njaa'y'ajtyindi ya naxwiñ.

#### Ka'ap ja nmigu'uk nyikwinmaamya'jtindit

<sup>13</sup>Paty ka'ap nnabyagajpxandit nixem niyam. Ne'egi ja' njotmay'ajtindip sudso ja nmigu'uk ngayikpøkyajtindit.

<sup>14</sup>Tumwa'ats nwindson'ajtim Jesús tø ttanibiktaagi, ka' ti nugo kø'øm tyimikpøkyety; kyø'ømwinmaa'ñ ja' pøn nømdip jøts ku øy ti kya'øyi kyawa'adsi. <sup>15</sup>Jøts ku ja jii'kxy midi kayak'ødyejp kayakwa'atstjep nnadyabagajpxandit nugo, ¿ti pya'ayo'owints jade'en njagyepyindip? Paty ka'ap pyaat'aty jøts ja nyikmøjindit pøni ti ja nmigu'uk yjii'kxyindip, jøts jade'en ngaduk'ayoosindit ja nmigu'uk, jøts ka'ap ja yjanchja'win kyudigø'ty. <sup>16</sup>Kidi ja' xuñ midi yjawi ja mdsinaa'yin ja

mjanchja'win yiktabagajpxp. <sup>17</sup>Kidi ja kaagyip jii'kxyip xagupøjkindip ja Dios ma ja kyutujk amuum ttanitani ja yja', pø ja øchinaa'yinxii ja chøjkpy ja tuda'aky'ajtin ja xondaajkin midi ja Espiritu Santo xmø'øyindip. <sup>18</sup>Pøn jade'en tmidump ja Cristo, ja' Dios chøjkpy jøts øyja'wiyip ja jaaly ja'.

<sup>19</sup>Wants tjaaknija'wa'andi sudso nbaajtindit ja tuda'aky'ajtin midi nyiktu'unindip jøts ja nnadyabudøjkandit nixem niyam, jøts jade'en myøktaajkindit ja njanchja'win. <sup>20</sup>Kidi ja ngø'øm ja' adøm nugo nyikmajadaajkindip, jøts adøm ja Dios yja' ngayikmøjtøjka'andit. Øy ni midi jii'kxy yjagayikpøkyety, jade'en ne'egi pyaat'aty jøts ja' xkajøø'kxtit midi ja mmigu'uk kya'øyja'wip jøts ja jade'en xkayikpøkyat. <sup>21</sup>Ne'egi øy'atpts ku ja tsu'uch ka' xtsu'utstit, uk xka'uuktit ja vino, uk xkatu'undit o ti, nugo ku ja mmigu'uk xkayikwinmaa'nmya'atti, nugo ku kyapøkyatti jade'en'ampy jøts kyatuu'tigø'odyit. <sup>22</sup>Dios ja ja'ayi mduknija'wip pøni sa mets ja mwinmaa'ñ xyikyø'øy. iJotkujk ja jaa'y pøn kyabadumpy midi ja pyøkyja'wip! <sup>23</sup>Pønts tjøø'kxp øy ti majtsk aaw majtsk joojt, kø'ømst ja ñankpyøkyetyi ku ja tjii'kxy, kumi ka'ap jotkujk tjii'kxy; jøts ti jaty kayiktump jotkujk'atyim, pøky ja'.

#### Ja' mdu'ump midi ja mmigu'uk tya'ødyøkip

**15** Pøn jaty møk tjagyajptip ja janchja'win, xpaat'ajtindip adøm jøts nbudøjka'andit pøn ja yjanchja'win tu'ugyi

tkamøøt'ajtipnim, jøts kidi adømyi kø'øm nnabya'ayø'øyindi. <sup>2</sup>Nidu'uk jaty adøm xpaat'ajtyindi jøts ja ndabudøjka'am midu ja ødyunidip jøts ja yjanchja'win myøjta'aktit. <sup>3</sup>Pø ni ja Cristoxi ojts kø'øm kyanabya'ayøyi, ne'egi ja yjaaktyimyajty jade'en sa jap nøkyjxpy yide'en wya'añ: "Tum øts ja tø xaja'atkixy sa jaty ti jaty mgayikta'ødyundip mgayikta'øñimaadyip." <sup>4</sup>Pø ja'agøjpxxi ja Dios ja kyajpxy tnankyjajyøø jøts adøm ja nnija'wa'an ti jaty ja ñigajpxy ja y'ixpøjkin, ja'ats adøm ja xmø'øyimp ja kajpxjot'amøki jøts tuda'aky ngupøjkindit o ti ayo'on, jøts tu'ugyi ja awejx'ajtin yikmøøt'att ku yikpaatt ja xemikøjxpit juky'ajtin. <sup>5</sup>Ja Dios Teetyts adøm xyikmajadaajkimp o ti ayo'on jøts ja xkajpxjot'amøjka'an. Wants ja mbudøkiyidi jøts mdsøønidit mdanidit yikxon nixem niyam, sam nwindson'ajtim Jesucristo tnajsttu'uni, <sup>6</sup>jøts tu'ugyi ni'amuki xja'byaattit xkajpxpaattit ja Dios Teety pøn ja nwindson'ajtim Jesucristo tyeety'ajtpy.

**Ku ja Dios y'øgyajpxy  
y'ømyadya'aky yikajpxwa'kxy  
ma jaa'y kya'israelit jaa'yidi**

<sup>7</sup>Nagyupøkidits nixem niyam, kidi sa mnadyijyidi mnawya'añidi, nagyupøkidi nayide'en sam adøm nwindson'ajtim Jesucristo tø xkupijkyindi Dios Teety wyindsøjkin wyinja'wingøjxp. <sup>8</sup>Pø israelit jaa'yxi ja Cristo ñimimpy jøts ja tpudøkit, jøts jade'en ja Dios Teety ja wyandaajkin tyik'adujkit

midi ja møjaa'dyøjk wyinaty tø yiktamiwanda'agidi. <sup>9</sup>Jøts nayi ñimeen ja' pøn ka'israelit jaa'dyi, jøts ja tja'byaattit tkajpxpaattit ja Dios ku ja pya'ayøyidi jadine'en, pø yide'enxi jap Salmos nøkyjøtpy wya'añ:

Nja'byaatp mets ngajpxpaatp  
mets øy ma naajx øy magajp,  
ma jaty ja jaa'y chøøni pøn  
ka'israelit jaa'dyi,  
jøts n'øø't jøts nxu'uxt mets  
windsøjkingøjxp.

<sup>10</sup>Jøts nayide'en wyami ja Dios kyugajpxy:

Mxonda'aktit tuknax pøn  
ka'israelit jaa'dyi møøt ja  
israelit jaa'y pøn ja Dios  
ja'ajtiyidip.

<sup>11</sup>Jøts jap abiky ma jap wyami:

Møja'wimyidi  
kunu'u'kxyja'wimyidi ja Dios  
ni'ijtyi pøn ka'israelit jaa'dyi,  
kajpxwa'kximyidi ja myøk'ajtin  
o magajp.

<sup>12</sup>Jøts yide'en Isaías

tyukjadya'anmiyøø ja Dios:

Ja Isai ñikøjxp pyidsøømt  
pøn ñiwindson'ajtmip pøn  
ka'israelit jaa'dyi;  
ja' ja tu'ugyi tyamiguy'ejxtip ja  
ñitso'ok'ajtin.

<sup>13</sup>Wan ja Dios mmø'øyidi ja xondaajkin ja tuda'aky'ajtin, midu xukjøp'ijxy'ajtindip ja kyunuu'kxin ku ja njanchja'wint, jøts jade'en ja ajot'ajtin tu'ugyi mdukmi'etidit Espiritu Santo myøk'ajtingøjxp.

<sup>14</sup>Migu'uktøjkti, jade'en ø nwa'añ jøts ku meets amuum xjagyepy ja nadyamiyoxi'ajtin jøts ja nijawi'ajtin. Wa'ats ja xnijawidi, jøts n'a'ejxip øts



ti jaty ja iiy yjagyajptip. <sup>28</sup>Kuts  
 øts yø n'uktun'abaadit ku øts ja  
 wyinaty tø ndagøðøkiidi ja pudøjkin,  
 winets ø ndsoont jøts ø nnøjkxt  
 jam España, uk naxpts øts jam  
 mā meets jam. <sup>29</sup>Jøts wa'ats ø  
 nnijawi jøts ku øts ja Dios amuum  
 ja kyunuu'kxin xabudøki, jøts øts ja  
 Cristo ngajpxwa'kxit ja y'øgyajpxy  
 ja y'ømyadya'aky ku øts jam nøjkk  
 nja'aty.

<sup>30</sup>Tundits migu'uktøjk ja may'ajt  
 nwindson'ajtim Jesucristo køjxp  
 jøts Espiritu Santo pøn xukja'wimp  
 ja tsojkin ja pa'ayo'owin, jøts  
 meets nayide'en mnadyamiyoxidit  
 øts ndunkjøøjp, ku meets ja  
 Dios x'amido'ot ja may'ajt jøts  
 ø xpudøkit. <sup>31</sup>Amidowdi ja Dios  
 wan øts x'agø'duky x'axajtuky,  
 jøts kidi myajada'akti ja jaa'y pøn  
 tkagupøjkti ja nwindson'ajtim  
 yja' jam Judea, jøts nayide'en  
 x'amido'odit jøts ejtni xoni  
 tkupøktit ja pudøjkin pøn  
 tsinaadyip jam Jerusalén, pøn  
 ja Dios ja'ajtidip, midi øts yam  
 ndaninøjkxwāndip, <sup>32</sup>jøts pøni  
 yikjajtpy Dios jøts øts øy jotkujk  
 nja'att mā meets jam, jøts øts jam  
 n'ukpoo'kxt. <sup>33</sup>Diosts mjagyapidip  
 pøn amuum ja øy'ajtin xondaajkin  
 tyajkp. Jade'en idø'on ja yjatt.

Ku ja Pablo tkajpxpoo'kxy ja  
 myigu'uk pøn jam Roma

**16** Mjaty'ejxtip ja Febe, adøm  
 ja nmøøtjanchja'wibi pøn  
 tump jam tsaptøjkjotp jam Cencreat  
 kajpjotp. <sup>2</sup>Kupøkti ja' yixxon, tundi  
 may'ajt Dios køjxpit sam pyaat'aty,  
 pø tu'ugyixi ja Dios yikjanchjawi.  
 Pudøkidits jøts xmo'odit ti jaty

jam ka'ejtxip, tø ja may'ampy  
 xjanchpudøjkandi, øts paat ja kø'øm  
 tø xpudøki.

<sup>3</sup>Kajpxpoo'kxti nayide'en ja  
 Priscila møøt ja Aquila, pøn tø  
 nmøøtundi jøts øøts ja Jesucristo  
 yja' nyikyø'øyyi. <sup>4</sup>Ja'agøjxpti  
 øts ixyam njujky'aty ku ja  
 kyø'ømjujky'ajtin ja o'jkin jøp'am  
 tpiktaktøø, nugo ku øts ja'ayi  
 jade'en xyiknitso'okti; xemikøjxp  
 øts ja Dios ja ndamøjawit, jøts  
 nayide'en ja ttamøja'wimyidi  
 niduki'iyi ja nmigu'uktøjk, pøn  
 tjanchja'widip ja Jesús mā jaa'y  
 kya'israelit jaa'yidi. <sup>5</sup>Kajpxpoo'kxti  
 nayide'en ja migu'uktøjkti pøn  
 namyujkidip jam Priscila jam  
 Aquila tyøjkjotpti. Kajpxpoo'kxidik  
 øts ja nmigu'uk Epeneto, pøn  
 midu'uk tjanchja'wiy'okwaan ja  
 nwindson'ajtim Jesucristo jam  
 Acaya etjotp. <sup>6</sup>Kajpxpoo'kxti  
 ja María midi jadine'en  
 tmidump ja Dios mā meets jam.  
<sup>7</sup>Kajpxpoo'kxidik øts ja nmigugajp  
 ja Andrónico jøts ja Junias, pøn  
 øts møøt tø nbuxøjktsøøni;  
 janch'øyjawi ja y'etti sam nayide'en  
 ja Cristo kyudanaabyitøjkti, jøts  
 jawyeen ja ne'egi tjanchja'widi ja  
 Cristo, oojknim øts.

<sup>8</sup>Nayi mgajpxpoo'kxtip ja Amplias,  
 pøn øts øy møøt namyayi Cristo  
 køjxp. <sup>9</sup>Jøts nayi kajpxpoo'kxti ja  
 Urbano, pøn øøts ojts nmøøtuñ  
 ku øøts ja nwindson'ajtim yja'  
 nduujni, jøts kajpxpoo'kxti  
 nayide'en øts ja nmigu'uk Estaquis,  
<sup>10</sup>jøts nayide'en ja Apeles pøn  
 kawinaak ojk tø ttamajada'aky ja  
 yjanchja'win Cristo køjxp, øy ja  
 wine'en ja ayo'on yjayiktanipiky.

Jøts kajxpoo'kxti nayide'en ja Aristobulo møøt ja y'u'nk ñidø'øxy.

<sup>11</sup> Kajxpoo'kxidik øts ja nmigugajp pøn txøøw'ajtp Herodión, jøts nayide'en ja Narciso, jøts pøn jaty jam tsinaadyip ja' tyøjkjotp, pøn ja nwindson'ajtim tø tjanchjawidi.

<sup>12</sup> Jøts nayide'en xkajxpoo'kxtit ja Trifena møøt ja Trifosa, pøn amuum tmidundip ja nwindson'ajtim, jøts nayide'en ja Pérsida, adøm ja nmigu'uk pøn kawine'en kujk tmiduñ ja Dios. <sup>13</sup> Jøts nayide'en xkajxpoo'kxtit ja Rufo, pøn amumjoojt tjantyimyjanchja'wip ja nwindson'ajtim, jøts kajxpoo'kxidi ja tyaak nayide'en, jade'en øts ja njawi sam øts ngø'ømdaagin.

<sup>14</sup> Kajxpoo'kxti ja Asíncrito, ja Flegonte, ja Hermas, ja Patrobas, ja Hermes, jøts møøt niduki'iyi ja migu'uktøjkti pøn ja Dios yjanchja'widip, pøn jaty ja jam møøtti. <sup>15</sup> Nayi kajxpoo'kxti ja Filólogo møøt ja Julia, jøts ja Nereo møøt ja myiga'axkiixy, jøts ja Olimpás nayide'en xkajxpoo'kxtit møøt niduki'iyi pøn jaty ja jam møøt, pøn ja Dios yjanchja'widip.

<sup>16</sup> Nadyuknijawiyidi ja kajxpoo'kxin nixem niyam sa Dios ttsøky. Mdanigajxidip ja kajxpoo'kxin pøn jaty ja nwindson'ajtim Jesucristo yjanchja'widip øy madsoo.

<sup>17</sup> Migu'uktøjkti, mjatyimy'ejxtibim pøn yiktseptøjkidip pøn yiktundigøødyip. Ja tsep ja nugo yiknaxkida'akwandip jøts mee mnawya'kxit, pø ja'axi ja yikma'atwandip midi meets tø myiktukmadø, pø ka'axi ja

yjade'eni midi mee tø xjaty midi mee tø xnijawi, jade'en ne'egi tyimbyaat'atyi ku xpuwa'atstít.

<sup>18</sup> Ka' yø'øbi jaa'y tmidundip ja nwindson'ajtim Jesucristo, kø'øm yø ñayjotmay'atyidi ti yø ejtxidip ka'ejtxidip, jøts twin'øøndi ja jaa'y pøn tkanija'widipnim, øy ja Dios yja' nadyijyi amyuyj tsaachuyj tmidajpxti. <sup>19</sup> Jøts ñija'wip øy pøn sa meets xpaduujni ja Dios yja'; ja'agøjxp mee ndajotkujk'aty. Ja' øts ja'ayi ndsøjkpy jøts xwinmaa'ñ'attit sa xu'undit ja tum ja øybi, jøts kidi ja ne'egi mjaakmayidi ja ka'øybi. <sup>20</sup> Jøts ja Dios pøn ja øy'ajtin xondaajkin amuum tjagyajp, tsojk ja nøjkx ja miku' myø'ajtin tyikwindigøjyi, jøts ja niti majadaajkin tka'ukpatnit meets mwingujky. Paatti ja nwindson'ajtim Jesucristo ja kyunuu'kxin.

<sup>21</sup> Nayi mdanigajxidipts ja Timoteo ja kajxpoo'kxin pøn øts møøt nduñ, jøts nayide'en Lucio, møøt ja Jasón, møøt ja Sosípater, øts nmigugajp nmigunaajxti.

<sup>22</sup> Nayi mgajxpoo'kxmidip ja Tercio nwindson'ajtimgøjxp, pøn øts ya'at nøky ndukjaapy.

<sup>23</sup> Jøts nayide'en mgajxpoo'kxyidi ja Gayo. Ja' tyøjkjotp øts yam ndsøøni, jøts nay ja' t'anuu'kxyajkp ja tyøjk mā ñamyukyidi pøn jaty ja Dios yjanchja'widip. Jøts nayide'en mdanigajxidip ja kajxpoo'kxin ja Cuarto jøts ja Erasto, pøn ja ya'at kajpmeñ myachomujky.

<sup>24</sup> Mo'ojidip ja nwidson'ajtim Jesucristo ja kyunuu'kxin mee niduki'iyi. Jade'ents øts idø'øn ndsøky'aty.

**Ku ja Dios y'ukyik'ajot'ajtni**

<sup>25</sup>Tmøja'windits

tkunuu'kxyja'windits ja Dios,  
wan mbudøkiyidi jøts ja  
mjanchja'win tu'ugyi amumjoojt  
xyik'ettit sam mduknijawiyidi ja  
øgyajpxy ja ømyadya'aky, sa ja  
nitso'ok'ajtin yikpaaty midi øts  
ngajpxwa'kxpy, ja Jesucristo  
y'ixpøjkin. Jøts ja' yø' midi ja  
Dios jekñim tø tnigajpxy, midi ja  
jegy tø xkaduknija'wa'am jøts ku  
ja jayimni jødsnim ja naxwii'ñit  
cho'onda'aky. <sup>26</sup>ixyamts ja tø

yiknijawinim ku ja kyajpxy  
y'ayuujk tø ttukjaadyañ ja  
kyugajpxtyøjk, sa kø'øm tyikutuky  
ja Dios Teety xemikøjxpit. Jøts  
ja tuki'iyi yiktuknijawidi ja kajp  
ja naajx jøts tjanchjawidit jøts  
tpaduujnidit ja yja'.

<sup>27</sup>iTu'ugyi Dios Teety møj  
jøts ja' tu'ugyi tnija'widyaapy,  
wants xemikøjxp ja tkupiky'aty  
tmadø'yaty adøm ja nwindsø'jkin  
ku ja nja'byaajtindi ngajpxpaajtindi  
amuum nwindsøn'ajtim Jesucristo  
køjxp! Jade'ents idø'øn ja y'ejxi  
tyiyi.